

NAQQIUT

Inatsisartut inatsisissaattut siunnersuut 12. august 2016 ullulerneqartoq taarsissavaa

(Inatsisartut Allattoqarfiannit innersuussisoqarnerata kinguneranik inatsisissatut siunnersuutip kalaallisoortaani oqaatsitigut naqqiuteqartoqarpoq. Inatsisissatut siunnersuummi aalajangersakkat ilaanni oqaatsitigut naqqiuteqartoqarpoq, kiisalu naqqiuteqarnerup kingunerisaanik oqaaseqaatini nalinginnaasuni iluarsisooqarpoq.)

Siunnersuummut oqaaseqaatit**Oqaaseqaatit nalinginnaasut****1. Aallaqqaasiut**

Soraarnerussutisiaqarnissaq siunertaralugu ileqqaarneq

Inatsisissatut siunnersuut soraarnerussutisiaqarnissamut tunngasutigut unammillersinnaanermut periarfissanik pitsanngorsaaniarnermik pissuteqarpoq. Aningaaseriviit Kalaallit Nunaanni angerlarsimaffeqartut imaluunniit aalajangersimasumik ingerlatsiveqartut, soraarnerussutisiaqarnissamut aningaasaateqarfiit Kalaallit Nunaanni angerlarsimaffeqartutuulli atugassaqartitaallutik soraarnerussutisiaqarnissamut aaqqissuussinernik maannakkut neqerooruteqarsinnaanngillat, tassami aningaaseriviit soraarnerussutisiaqarnissamut aaqqissuussinerit pillugit akileraartarnermi inatsimmi maannakkut maleruagassaasuni pineqartunut ilaannngillat.

Inatsisissatut siunnersuut soraarnerussutisiat pillugit inatsisinik ineriartortitsinerup, utoqqalinersiutit pillugit inatsit UKA 2015-imi aaqqissuuteqqinneqarmat aallartinneqartup, aammalu soraarnerussutisiaqarnissamut aaqqissuussinernut nunani allaniittunut akiliutit akileraaruserneqartalernissaannik UPA 2016-imi akuersissutigineqartumik malitseqartup ilagaa.

Aamma inatsisissatut siunnersuut soraarnerussutisiaqalernissamut pinngitsoorani ileqqaarnissamik aaqqissuussinerit pillugit inatsisissatut siunnersuummut uunga ilutigitillugu saqqummiunneqartumut attuumassuteqartinneqassaaq.

Inatsisissatut siunnersuutip matuma innuttaasut soraarnerussutisiaqarnissamut aaqqissuussinernik imminnut naleqqunnerpaasunik toqqagassaqaarnerulernissaat kingunerissavaa.

Inatsisissatut siunnersuutip pingaarnertut siunertaraa aningaaseriviit soraarnerussutisiaqarnissamut sillimmasernissamullu aaqqissuussinernik aaqqissuussaasumik neqerooruteqarsinnaanissaannik periarfissiinissaaq.

Kinguaariinnut tullernut nikisitsinermi akileraarusiinissamik kinguartitsinermi aningaasanut killiliussamik qaffaaneq

Aktie- imaluunniit anpartsselskabimi sulisup ilaatigut akissarsiami ilaanik, “kinguaariinnut tullernut nikisitsinermit atatillugu aktianik anpartinilluunniit” pisinerminut atugaanik akileraarusiinissap ukiumut aningaasarsiorfiusumut kingusinnerusumut kinguartinneqarnissaa, sulisullu ilaatigut aamma “kinguaariinnut tullernut nikisitsinermit atatillugu aktianik anpartinilluunniit” nalikinnerutillugit pisiaasa nalingannik akileraarusiinissap ukiumut aningaasarsiorfiusumut kingusinnerusumut kinguartinneqarnissaa, Aningaasarsianit akileraarutit pillugit Inatsisartut inatsisaanni § 57 naapertorlugu akuersissutigineqarsinnaapput.

Aningaasat akuersinerni taakkunani pineqartut ukiumi aningaasarsiorfimmi ataatsimi 100.000 koruuninit maannamut amerlanerusinnaanngillat. Kinguaariinnut tullernut nikisitsisinnaaneq sulisunullu tunisisinnaaneq siuarsarniarlugit siunnersuutaavoq aningaasanut killiliussap 350.000 kr.-inut qaffanneqarnissaa. Inatsisissatuttaaq siunnersuut aqqissuussinerup ullumik- kut immanguaannaq atugaaneraniq pissuteqarpoq. Taamaanneranut pissutaasut ilagissagunarpaat aningaasat amerlanerpaaffissaata assigiinngitsorpassuartigut appasingaatsiarnera, taamaammallu aqqissuussineq aqutigalugu selskabimi aktianik anpartinillu amerlasuunik pisinissaq sivilissalluni.

Aningaasat amerlanerpaaffissaasa killinganik qaffaanermit ilutigitillugu akuersisernerup ukiumi qulinik killilerneqarnissaa aammalu aningaasat katillutik amerlanerpaaffissaannik 3.500.000 kr.-inik atuutilersitsinissaq siunnersuutaapput. Tassuunakkut siunertarineqarpoq aqqissuussinerup inussutissarsiutinik akileraarusiisarneq pillugu maleruagassanik sakkukillisisivallaannginnissaa.

Aalajangersagaq Inatsisartut inatsisaatigut nr. 9, 11. november 2000-imeersukkut atuutilersin- neqarpoq. Aningaasanut killiliussaq Inatsisartut inatsisaatigut nr. 2, 26. april 2007-imeersuk- kut 50.000 kr.-iniit maanna angissuserisaminut 100.000 kr.-inut qaffanneqarpoq.

Aaqqissuussinerugallartoq

Ineqarnermut tapiissutinik, siusinaartumik pensionisianik utoqqalinersiutinillu pisartut soraar- nerussutisiaqarnissamut aqqissuussinermit nunami allamiittumut akiliuteqartarunik pisartak- kaminnik 2017-imiit ikilileriffigineqaratarsinnaanerit Naalakkersuisunut ilisimatitsissutigine- qarpoq.

Soraarnerussutisiaqarnissamut aqqissuussinernut nunani allaniittunut akiliutit ilanngaatigine- qarsinnaanerit aamma sulisitsisut akileeqaataassutaasa ilanngunneqartussaanninnerat, ani- ngaasarsianit akileraarutit pillugit Inatsisartut inatsisaata allanngortinneqarnera pillugu Inatsi-

sartut inatsisaatigut nr. 7, 6. juni 2016-imeersukkut 1. januar 2017-imiit atuutilersussamik atorunnaarsinneqarput. Inuit pineqartut aningaasarsiaasa akileraaruteqaataasussat qaffannissaat tamatuma kingunerissavaa. Aamma taamaassapput pineqartut maannakkorpiaq aningaasarsiaat. Ineqarnermut tapiissutit, siusinaartumik pensionisiaat aamma utoqqalinersiutit amerlassusii pissarsisartut maannakkorpiaq aningaasarsiaasa amerlassusiinit ilaatigut aalajangigaammata ineqarnermut tapiissutinik, siusinaartumik pensionisianik utoqqalinersiutinillu pissarsisartut ilaasa pisortanit pissarsiarisartagaat, akileraartarnermi maleruagassat nutaat kingunerisaannik maannakkornit ikinneruleratarsinnaapput. Tamanna akileraartarnermut inatsisip upernaq allannguutaasa siunertarinngilaat.

Ajornartorsiutaalersoq inatsisinut, pissarsisartut maannakkorpiaq aningaasarsiaat tunngavigalugit tunniunneqartartunut tunngasunut 2017-imi 2018-imilu malunniutissaaq. Aamma ajornartorsiutaalersoq inatsisinut, pissarsisartut aningaasarsiaat akileraaruteqaataasussat tunngavigalugit tunniunneqartartunut tunngasunut 2019-imiit malunniutissaaq.

Naalackersuisut isumaqarput ajornartorsiut aaqqinneqassasoq. Taamaammat aaqqissuussinerugallartussamik ineqarnermut tapiissutinik, siusinaartumik pensionisianik utoqqalinersiutinillu pissarsisartut ullumikkutut inissisimanissaannik kinguneqartussamik atuutilersitsinissaq aallaqqaammut siunniunneqarpoq. Tamanna pissaaq soraarnerussutisiaqarnissamut aningaasateqarfinnut nunani allaniittunut akiliutit, maannakkorpiaq aningaasarsiat ineqarnermut tapiissutinut, siusinaartumik pensionisianut utoqqalinersiutinullu tunngatillugu naatsorsorneqarneranni ilanngunneqartussaanginnerisa inatsisissatut siunnersuummi matumani § 2, imm. 2-mi aalajangersarneqarneratigut.

Aaqqiissutissamik ataavartussamik, inatsisinik taaneqartunik inatsisinillu aningaasarsiat akileraaruteqaataasussat tunngavigalugit tunniussa qarfiusartunik imaqartussamik 2017-ip ingerlanerani saqqummiussinissartik Naalackersuisut naatsorsuutigaat.

2. Inatsisissatut siunnersuutip pingaarnersai

Soraarnerussutisiaqarnissaq siunertaralugu ileqqaarneq

Inatsisissatut siunnersuutip pingaarnertut siunertaraa aningaaseriviit soraarnerussutisiaqarnissamut sillimmasernissamullu aaqqissuussinernik aaqqissuussaasumik neqerooruteqarsinnaanissaannik periarfissiinissaq. Tassa imaappoq soraarnerussutisiaqarnissamut ileqqaakkat aningaasaqarnikkut ingerlatsivinni, Finanstilsynimit akuersissummik peqarlutik Kalaallit Nunaanni aningaaseriveqarnermik ingerlatsisuni pilersinneqarsimasut akileraaruserneqartarnerisa naligiimmik pineqarnissaat siunnersuutip matuma siunertaraa.

Soraarnerussutisiaqarnissaq siunertaralugu ileqqaakkanik, aningaaserivinni Kalaallit Nunaanni angerlarsimaffeqartuni imaluunniit aalajangersimasumik ingerlatsiveqartuni pilersitsisin-

naaneq siunnersuutikkut periarfissaalissaaq. Soraarnerussutisiaqarnissamut uninngasuutinut kontumik piginnittup kontumi uninngasuutit tamaasa taakkuluunniit ilaat aningaasanik nallinnik nammineerluni pisissutigisinnaavai allalluunniit taamaaliornissamik isumaqatigiissuteqarfigisinnaallugit.

Siunnersuutip kingunerissavaa aningaasat soraarnerussutisiaqarnissaaq siunertaralugu ileqqaakkaniittut aningaasaliissutigineqarnissaasa piumasaqaataanissaa. Ukiut soraarninngorfissat nalleriartuaartillugit soraarnerussutisiaqarnissamut ileqqaakkat sunut aningaasaliissutigineqarsimanerat naleqqussarneqartariaqarpoq, aningaasallu ilaat amerlanerit aningaasaliiffissanut nalorninaannerusunut atorlugit. Taamaammat aningaasat soraarnerussutisiaqarnissamut uninngasuutinut kontumiittut ilaasa qanoq amerlatigisut aktianik aamma aningaasaliiffissanik akuleriiaanik pisinermut atorneqarsinnaanerit pillugu, ukiut malillugit annerpaaffissanik aalajangersaasoqarpoq. Annerpaaffissat siunnersuutigineqartut qaangerneqaraangata pappialaatit aningaasanik nalillit oqimaaqatigiissaqqinneqartassapput.

Oqimaaqatigiissaarineq amerlanertigut pisinnaavoq aktianik imaluunniit aningaasaliiffissanik akuleriiaanik pisinngikkallarnikkut. Kisianni piginnittup ukiumi oqimaaqatigiissaarinissamik piumasaqaatip atuutilerfigisaani ullormi 31. decemberimi 63-inik ukioqalereersimanningsissaa, aammalu soraarnerussutisiaqarnissaaq siunertaralugu ileqqaakkanut ukiuni kingullerni pingasuni akiliisoqarsimanissaa piumasaqaataapput. Piumasaqaatit arlaat eqquutsinneqanngippat oqimaaqatigiissaareqqittoqassaaq.

Aningaasaliinerup isumannaatsuunissaa eqqarsaatigalugu siunnersuutigineqarpoq ileqqaakkat pigisamik aalaakkaasumik, suliffeqarfimmik inummit pigineqartumik, imaluunniit aktianik anpartinilluunniit, selskabimi atuisinnaanermik piginnaatitaaffinnik, akikillisaatinik assigisaannilluunniit tunniussinissamik siunertaqartunik pisinermut atorneqarsinnaassanngitsut. Aamma aningaasat ileqqaakkaniittut suliffeqarfimmik, piginnittup piginnittulluunniit ilaquttani peqatigalugit piginneqataassutit 25 procentiinik amerlanerusunilluunniit piginnittuuffigisaanik pisinermut atorneqarsinnaanngillat.

Soraarnerussutisiaqarnissamut uninngasuutinut kontu ileqqaakkanik piginnittup kontuinit aningaaseriviullu neqeroorutaanit allanit avissaarsimatilluinnarneqassaaq. Uninngasuutinit piginnittumut tunniussisarneq siusinnerpaamik aallartissinnaavoq piginnittup 60-inik ukioqalerneraniit, ukiukinnerunissaaq akileraaruseriffimmit akuerineqarsimannngippat. Tunniussisarneq kingusinnerpaamik aallartinneqassaaq piginnittup pensionisiaqalerfissani, utoqqalinersiutit pillugit inatsimmi aalajangersagaasoq anguppagu.

Soraarnerussutisiaqarnissamut uninngasuutinut kontumi uninngasuutit piginnittoq toquppat taassuma aappaanut, qitornaanut qimagaasunut, aappaanut avissimasaanut inooqatigisaanulluunniit tunniunneqarsinnaapput.

Kikkut soraarnerussutisiaqarnissamut aaqqissuussinermut akiliisinnaanerat killeqanngilaq, kisianni piginnittup kisiimi akiliutit aningaasarsiaminit akileraaruteqaataasussanit ilanngaatigisinnaavai. Aamma sulisitsisup akileeqaataassutai piginnittumut akileraaruteqaataanavianngilat. Kisianni ilanngaateqartoqarsinnaassappat aammalu sulisitsisup akileeqaataassutai ilanngunneqassanngippata piginnittup nunamut maanga tamakkiisumik akileraartussaaitaanissaa piumasqaataavoq.

Siunnersuutaavoq aningaasat soraarnerussutisiaqarnissaq siunertaralugu ileqqaakkaniittut minnerpaamik 50 procentii inuuneq naallugu ingerlaavartumik, toqunikkut unittussamik tunniunneqartarnissaat piumasqaataassasoq. Tamanna isumaqarpoq tunniussineq siulleq pitinagu inuuneq naallugu soraarnerussutisiassat minnerpaaffissatut piusaqaammik eqquutsitsisup pilersinneqassasut. Inuuneq naallugu soraarnerussutisiassat aningaasanit soraarnerussutisiaqarnissaq siunertaralugu uninngasuutineersunit aningaasalersorneqassapput. Aningaasat soraarnerussutisiaqarnissaq siunertaralugu ileqqaakkaniittut annerpaamik 50 procentii ukiuni ikinnerpaamik qulini naafferartumik amerlaqatigiiatut tunniunneqarsinnaapput (naafferartumik soraarnerussutisiat).

Uninngasuutit ilaasa inuuneq naallugu tunniunneqartussaannissaannik piumasqaatip piginnittumut kingunerissavaa, pineqartup soraarninngorluni inuunini tamaat aningaasanik amerlanerusunik pisartagassaqaarnissaa, tassa pineqartup piffissap ilaani pisortanit utoqqalinersiutaannarnik pisarnissaraluanut sanilliullugu. Piumasqaat taamaalilluni soraarnerussutisiallit ataasiakkaat aningaasaqarniarnerisa nikerarnissaraluannik killilersimaarinnissaaq.

Siunnersuutip kingunerissavaa soraarnerussutisiaqarnissaq siunertaralugu ileqqaakkanik piginnittup aktiat, obligationit, aningaasaliiffissat akuleriiaat il.il., aningaasat soraarnerussutisiaqarnissamut uninngasuutinit kontumiittut atorlugit pisiarineqarsimasut imminut tiguppagit, taava piginnittup pigisap nalingata amerlaqatai soraarnerussutisiaqarnissamut uninngasuutinit kontumut akilissagai, pigisallu nalinga aningaaserivimmumut nalunaarutigissagaa.

Siunnersuutaavoq piginnittup soraarnerussutisiaqarnissaq siunertaralugu ileqqaakkat aningaaserivimmi allami imaluunniit soraarnerussutisiaqarnissamut aningaasaateqarfimmumut aamma soraarnerussutisiaqarnissamut inuunermillu sillimasiiisarfimmumut Kalaallit Nunaanni angerlarsimaffeqartumi imaluunniit aalajangersimasumik ingerlatsiveqartumi ileqqaakkanut assingusunut nuussinnaassagai, akileraarutitigut akitsuutitigullu kinguneqartussaannigsumik.

Siunnersuutaavoq uninngasuutinit tunniunneqartut soraarnerussutisiaqarnissaq siunertaralugu ileqqaakkanik piginnittup, imaluunniit piginnittup toquneratigut tunniunneqartussanik pisinnaatitaasup akileraaruteqaatigissagai.

Aningaaseriviit soraarnerussutisiaqarnissamut uninngasuutinut kontunit tunniussisoqarnerani akileraarutitik A-nik unerartitsissapput akileraaruseriffimmullu nassuiaatinik il.il. tunniussil-lutik. Pisusaaffiit taakku akileraaruseriffik soraarnerussutisiaqarnissaq siunertaralugu ileq-qaakkanik akileraarusiisarnermik nakkutilliinissamut periarfississavaat.

Siunnersuutaavoq soraarnerussutisiaqarnissaq siunertaralugu ileqqaakkat nappaat inuunermut navianartoq pissutigalugu atorunnaarsinneqartut aningaasarsianit akileraarummik nalingin-naasumik akileraaruserneqartassasut. Tassa imaappoq akileraartarnermi inatsimmi § 46 naa-pertorlugu akitsuummik akiliisoqassanngilaq.

Aningaaseriviit aningaaseriveqarnermik ingerlatsineq pillugu inatsimmik malinnittussaamma-ta, niuernermi ileqqorissaarluinnarnissaq pitsaasumillu sulinissaq pillugit tassani piumasaaqaa-tit atuuttut aammattaaq soraarnerussutisiaqarnissaq siunertaralugu ileqqaakkanut taakkunun-galu atatillugu aningaasaliinernut tunngasunut atuupput.

Aalajangersakkat malinneqarnerisa misissorneqartarneri akileraartarnermut ingerlatsiviup paarivaa. Matumunnga atatillugu atugassatut naatsorsuutigineqarpoq aningaaseriviit ukiumoortumik akileraartarnermut ingerlatsivimmul nalunaarusiortarnissaat, aningaasaliissutit fondskodeni il.il. qanoq aggulussimanersut. Nalunaarsuisussaataitanermik aalajangiiniarnermi innuttaasunut aningaaserivinnullu aningaasartuutissat eqqarsaatigilluarneqarniassapput, misissuinermit atatillugu naleqqunnersut.

Kinguaariinnut tullernut nikisitsinermi akileraarusiinissamik kinguartitsinermi aningaasanut killiliussanik qaffaaneq

Siunnersuutaavoq kinguaariinnut tullernut nikisitsinermi akileraarusiinissamik kinguartitsi-nermi aningaasanut killiliussat qaffanneqassasut. Aaqqissuussineq maannamut annikitsuinnar-mik atorneqarsimavoq, taamaanneralu aningaasanut killiliussap ukiumoortup maanna atuut-tup, aaqqissuussineq inuussutissarsiutigalugu suliffeqarfinnik mikigaluanilluunniit kinguaa-riinnut tullernut nikisitsinissami atussallugu appasippallaarneranik pissuteqarsorinarpoq. Sul-i-sisisut (GE) siunnersuutigaat aningaasanut killiliussaq atorunnaarsinneqassasoq, aaqqissuus-sineq inuussutissarsiutinik ingerlataqartut kinguaariinnut tullernut nukisitsisinnaanissaannut iluaqutaalluaqqullugu.

Aaqqissuussinerugallartoq

Soraarnerussutisiaqarnissamut aningaasaateqarfinnut nunani allaniittunut akileraaruseereernani akiliutit maannakkorpiaq aningaasarsiat ineqarnermut tapiissutinut, siusinaartumik pensionisianut utoqqalinersiutinullu atatillugu naatsorsorneqarneranni ilanngunneqannginnissaannik aalajangersaanissaq siunnersuutaavoq. Ineqarnermut

tapiissutinik, siusinaartumik pensionisianik utoqqalinersiutinillu pissarsisartut taamaaliornikkut ullumikkutut inissisimassapput.

Aaqqiissutissamik ataavartussamik, inatsisinik taaneqartunik inatsisinillu aningaasarsiat akileraaruteqaataasussat tunngavigalugit tunniussa qarfiusartunik imaqtartussamik 2017-ip ingerlanerani saqqummiussinissartik Naalakkersuisut naatsorsuutigaat.

Inatsisissatut siunnersuut inatsimmut atuuttumut sanilliullugu	
<i>Oqaasertai atuuttut</i>	<i>Inatsisissatut siunnersuut</i>
	Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, Inatsisartut inatsisaatigut nr. xx, xx. 2016-imeersukkut kingullermik allangortinneqartumi makku allannguutigittinneqarput:
	<p>1. § 46, imm. 5-itut ilanngunneqarpoq: <i>”Imm. 5. Imm. 1 aamma 2 atuutissanngillat soraarnerussutisiaqarnissamut inuunermulluunniit sillimmasiinermik aaqqiissuussinermut imaluunniit soraarnerussutisiaqarnissaq siunertaralugu ileqqaakkanut qaammatit 23-t sinnerlugit akiliisoqarsimanngippat, aaqqiissuussinerullu ileqqaakkalluunniit nalingat piffissami atorunnaarsitsiffiusumi 10.000 kr.-init minneruppat.”</i></p> <p>2. § 47-p kingornagut qulequttatut nutaatut ilanngunneqarpoq:</p> <p style="text-align: center;"><i>”Kapitali 4 a</i></p> <p style="text-align: center;"><i>Soraarnerussutisiaqarnissaq siunertaralugu ileqqaakkat”</i></p>
	<p>3. Qulequttap nutaap kingornagut ilanngunneqarput: <i>”§ 47 a. Kapitali una soraarnerussutisiaqarnissaq siunertaralugu ileqqaakkanut, aningaa-</i></p>

	<p>serivinni Kalaallit Nunaanni angerlarsimaffeqartuni imaluunniit aalajangersimasumik ingerlatsiveqartuni, Finanstilsynimillu akuersissummik peqarlutik nunami maani aningaaseriveqarnermik ingerlatsisuni pilersinseqarsimasunut atuuppoq.</p> <p>§ 47 b. Soraarnerussutisiaqarnissaq siunertaralugu ileqqaakkanut akiliutit soraarnerussutisiaqarnissaq siunertaralugu aningaaserivimmi pineqartumi uninngasuutit kontuinut immikkut ittunut ikineqassapput.</p> <p><i>Imm. 2.</i> Kontumut atatillugu aalajangersarneqarsimassaaq aningaasaatit erniaallu il.il. kontumik piginnittumut tunniunneqassasut. Aammattaaq piginnittoq toquppat tunniunneqarnissaat pillugu aalajangersaasoqarsimassaaq. Aappaasunut, inooqatigisanut aamma qitornanut qimagaasunut, § 39, imm. 1, nr. 4-mi taaneqartunut taamaallaat tunniussinissamik aalajangersaasoqarsinnaavoq. § 39, imm. 1, nr. 4-mi aalajangersakkat tamattutaaq atuutissapput.</p> <p><i>Imm. 3.</i> Aamma piginnittoq, Siusinaartumik pensionisiat pillugit Inatsisartut inatsisaanni maleruagassat naapertorlugit siusinaartumik pensionisiaqarlersinneqassagalarpat imaluunniit piginnittoq nappaammit inuunermut navianartorsiortitsisumik eqqorneqassagalarpat piginnittumut tunniussinissaq aalajangerneqarsinnaavoq.</p> <p><i>Imm. 4.</i> Innarluutilittut ingerlaavartumik pensionisiaqarnissamik sillimmasiineq § 39, imm. 1-imi taaneqartoq, imaluunniit nappaatit inuunermut navianartorsiortitsisut ilaannut sillimmasiineq kontumut atatillugu pilersinseqarsinnaavoq.</p> <p><i>Imm. 5.</i> Akiliutit imm. 1-imi taaneqartut aningaasarsiat akileraaruteqaataasussat naatsorsorneranni ilanngaatigineqarsinnaapput. Ilanngaateqarsinnaatitaaneq uninngasuutitut kontumik pineqartumik piginnittumut atuuppoq, kina akiliuteqarsimanersoq apeqqutaattinnagu, taamaallaallu atuulluni piginnittoq nunami maani tamakkiisumik akileraartus-</p>
--	--

	<p>saatitaatillugu akilerneqarsimasunut.</p> <p><i>Imm. 6.</i> Sulisuusup aningaasarsiaasa akileraruteqaataasussat naatsorsorneranni ilanngunneqassanngillat aningaasat, sulisitsisup ileqqaakkanut imm. 1-imi taaneqartunut akiligai. Sulisitsisup akileeqaataassutaasa ilanngunneqartussaanninnerat sulisuusup nunami maani tamakkiisumik akileraartussaaitaanerani akilerneqarsimasunut taamaallaat atuuppoq.</p> <p><i>Imm. 7.</i> Soraarnerussutisiaqarnissaq siunertaralugu ileqqaakkat iluanaarutitaat piginnitup aningaasarsiaasa akileraruteqaataasussat naatsorsorneranni ilanngunneqassanngillat. Selskabit peqatigiiffiillu Kalaallit Nunaanni angerlarsimaffeqartut iluanaarutisianik pissanngortitsisut, tak. § 86, imm. 1 og 2, iluanaarutisianit akilerarutininik unerartitsissanngillat iluanaarutisiat soraarnerussutisiaqarnissaq siunertaralugu ileqqaakkanut tunniunneqarpata.</p> <p>§ 47 c. Aningaasat soraarnerussutisiaqarnissaq siunertaralugu ileqqaakkaniittut aat-saat aktianik aamma aningaasaliiffissanik akuleriiaanik pisinermut atorneqarsinnaapput, ileqqaakkat tamarmiusut ilaat aktianik aningaasaliiffissanilluunniit akuleriiaanik pisinermut atorneqartut amerlanerpaaffissaattut killiliussat makku qaangersimanngip-patigik:</p> <p>a) Ileqqaakkanut kontuni aningaasaatit inunnit 35-t inorlugit ukiulinnit pigineqartut atorlugit aktiat pisiarineqartut annerpaamik 80 pct.-iusinnaapput aningaasaliiffissallu akuleriiaat pisiarineqartut annerpaamik 20 pct.-iusinnaallutik.</p> <p>b) Ileqqaakkanut kontuni aningaasaatit inunnit 35-niit 44-t tikillugit ukiulinnit pigineqartut atorlugit aktiat pisiarineqartut annerpaamik 70 pct.-iusinnaapput aningaasaliiffissallu akuleriiaat pisiari-</p>
--	---

	<p>neqartut annerpaamik 15 pct.-iusinnaallutik.</p> <p>c) Ileqqaakkanut kontuni aningaasaatit inunnit 45-niit 49-t tikillugit ukiulinnit pigineqartut atorlugit aktiat pisiarineqartut annerpaamik 60 pct.-iusinnaapput aningaasaliiffissallu akuleriiaat pisiarineqartut annerpaamik 10 pct.-iusinnaallutik.</p> <p>d) Ileqqaakkanut kontuni aningaasaatit inunnit 50-iniit 59-it tikillugit ukiulinnit pigineqartut atorlugit aktiat pisiarineqartut annerpaamik 50 pct.-iusinnaapput aningaasaliiffissallu akuleriiaat pisiarineqartut annerpaamik 5 pct.-iusinnaallutik.</p> <p>e) Ileqqaakkanut kontuni aningaasaatit inunnit 60-iniit 64-it tikillugit ukiulinnit pigineqartut atorlugit aktiat pisiarineqartut annerpaamik 40 pct.-iusinnaapput aningaasaliiffissallu akuleriiaat pisiarineqartut annerpaamik 0 pct.-iusinnaallutik.</p> <p>f) Ileqqaakkanut kontuni aningaasaatit inunnit 65-iniit 69-it tikillugit ukiulinnit pigineqartut atorlugit aktiat pisiarineqartut annerpaamik 30 pct.-iusinnaapput aningaasaliiffissallu akuleriiaat pisiarineqartut annerpaamik 0 pct.-iusinnaallutik.</p> <p>g) Ileqqaakkanut kontuni aningaasaatit inunnit 69-it sinnerlugit ukiulinnit pigineqartut atorlugit aktiat pisiarineqartut annerpaamik 15 pct.-iusinnaapput aningaasaliiffissallu akuleriiaat pisiarineqartut annerpaamik 0 pct.-iusinnaallutik.</p> <p><i>Imm. 2. Aktiat imaluunniit aningaasaliiffissat akuleriiaat qaammatip naanerani amerlassusiisa amerlanerpaaffissaq imm. 1-imi taaneqartoq qaangersimappassuk oqimaatigiissaareqqittoqassaaq, taamaattorli</i></p>
--	--

	<p>tak imm. 3.</p> <p><i>Imm. 3.</i> Soraarnerussutisiaqarnissaq siunertaralugu ileqqaakkanut, inummit ulloq 31. december suli 63-inik ukioqalersimannigtsu- mit pigineqartunut ukiuni aningaasarsiorfinni kingullerni pingasuni akiliisoqarsimappat oqimaaqatigiissaareqqinneq pisinnaavoq, ak- tiat imaluunniit aningaasaliiffissat akuleriiaat pigineqatut annerpaaffissamit imm. 1-imi taaneqartumit minnerulernissaat tikillugu ak- tianik imaluunniit aningaasaliiffissanik akuleriiaanik pisinnginnikkut.</p> <p>§ 47 d. Aningaasat soraarnerussutisiaqarnis- saq siunertaralugu ileqqaakkaniittut pigisa- mik aalaakkaasumik imaluunniit aktianik il.il., niuerfinni aaqqissuussaasuni imaluun- niit niuerfittut aaqqissuussaasuni niuerutissa- tut ilanngunneqarsimannigtsunik, imaluunniit aktianik il.il., uninngasuutinut kontumik pi- ginnittup atuisinnaanermik piginnaatitaaffin- nik, akikillisaatinik assigisaannilluunniit, imaluunniit suliffeqarfimmi namminersorluni inuussutissarsiummi piginneqataassutininik tu- nineqarnissaanik siunertaqartunik, siunerta- milluunniit ilaatut taama siunertaqartunik pi- sinermut atorneqarsinnaanngillat.</p> <p><i>Imm. 2.</i> Pappiaqqat aningaasanik nalillit, pappiaqqanik aningaasanik nalilinnik atuuti- lersitsisartumit ataatsimit atuutilersinneqartut piffissami pisiarineqarfimminni nalingat so- raarnerussutisiaqarnissaq siunertaralugu ileq- qaakkat tamarmiusut 20 procentiannit angi- nerusinnaanngilaq. Kisianni pappiaqqanut aningaasanik nalilinnut, pappiaqqanik aningaasanik nalilinnik atuutilersitsisartumit ataatsimit atuutilersinneqartunut 50.000 kr.-it tamatigut atorneqarsinnaapput. Aningaasat taaneqartut kisitsisit akinut iluarsisutit, kisitsisit akinut iluarsisutit 1. julimeersut qaammatit 12-it kingulliit ingerlaneranni allannguutaattut naatsorsukkat tunnga- vigalugit Naatsorsueqqissaartarfimmit naat- sorsorneqarsimasut malillugit iluarsineqas- sapput. Iluarsineq ukiumoortumik pisassaaq, ukiumi tulluuttumi 1. januar atuuttussanngor- lugu. Aningaasat iluarsisat Naalakkarsuisut</p>
--	---

	<p>ukiut tamaasa kingusinnerpaamik 1. januar tamanut nalunaarutigisassavaat.</p> <p><i>Imm. 3.</i> Aningaasat soraarnerussutisiaqarnissaq siunertaralugu ileqqaakkaniittut selskabini aktianik il.il., piginnittup piginnittullu ilaqutaasa selskabimi aktiat il.il. 25 procentiinik amerlanerusunilluunniit piginnittuuffigisaanni pisinermut atorneqarsinngillat. Piginneqataassutit naatsorsorneranni aammattaaq ilanngunneqassapput aktiat il.il., piginnittup soraarnerussutisiaqarnissamik aqqissuussinerup saniatigut pigisai kiisalu aktiat il.il., pineqartup aapparisaanit, angajoqqaavinit, aataakkuinit/aanakuinit, qitornaanit, erngutaanit tamakkulu aapparisaannit pigineqartut. Qitornassat qitornavissartaarisimasallu ilaqutavittut isigineqassapput.</p> <p>§ 47 e. Soraarnerussutisiaqarnissaq siunertaralugu ileqqaakkanik piginnittup aktiat pigisalluunniit allat, aningaasat soraarnerussutisiaqarnissaq siunertaralugu ileqqaakkaneersut atorlugit pisiarineqarsimasut tigugunigit, piginnittup pigisap tiguneqartup nalinga aningaaserivimmut nalunaarutigissavaa, nalingalu soraarnerussutisiaqarnissaq siunertaralugu uninngasuutit kontuannut akilissallugu. Pigisap tiguneqartup il.il. nalingata akiliinerit qaangerpagit, assigiinngissut § 46, imm. 1-imi aalajangersagaq malillugu akileraaruserneqassaaq.</p> <p><i>Imm. 2.</i> Soraarnerussutisiaqarnissaq siunertaralugu ileqqaakkanik, aningaaseriviit § 47 a-mi taaneqartut akornanni, imaluunniit aningaaseriviit § 47 a-mi taaneqartut aamma soraarnerussutisiaqarnissamut aningaasaateqarfiit aammalu inuunermut soraarnerussutisiaqarnissamullu sillimmasiisarfiit Kalaallit Nunaanni angerlarsimaffeqartut akornanni nuusineq tunniussinertut akiliinertullu isigineqassanngilaq.</p> <p>§ 47 f. Soraarnerussutisiaqarnissaq siuner-</p>
--	--

	<p>taralugu ileqqaakkanit piginnittumut tunnius-sisarnerit siusinnerpaamik aallartissinnaapput ulloq piginnittup 60-inik ukioqalerfia aallarnerfigalugu, ukiukinnerunissaq akileraaruseriffimmit akuerineqarsimanngippat. Tunnius-sisarnerit kingusinnerpaamik aallartissapput ullormi piginnittup soraarninngornissamut ukiuni anguppagit, tak. Utoqqalinersiaqarneq pillugu Inatsisartut inatsisaat § 1.</p> <p><i>Imm. 2.</i> Soraarnerussutisiaqarnissaq siunertaralugu ileqqaakkanit tunniussinissaq siulleq pitinnagu, piginnittup tunniunneqartartussat qanoq agguataagaanissaat aalajangissavaa. Piumasaqaatit makku eqquutsinneqassapput:</p> <p>1) Piginnittup soraarnerussutisiaqarnissaq siunertaralugu ileqqaagaasa aamma soraarnerussutisiaqarnissamut inuunermullu sillimmasiinermik aaqqissuussinerisa ikinnerpaamik 50 %-ii inuuneq naallugu, toqussaq tikillugu ingerlaavartumik tunniunneqartartussat tunniunneqassapput.</p> <p>2) Piginnittup soraarnerussutisiaqarnissaq siunertaralugu ileqqaagaasa aamma soraarnerussutisiaqarnissamut inuunermullu sillimmasiinermik aaqqissuussinerisa amerlanerpaamik 50 %-ii sivikinnerpaamik ukiuni qulini amerlaqatigiiarlugit tunniunneqartartussat naafferartumik tunniunneqartarsinnaapput.</p> <p><i>Imm. 3.</i> Imm. 2 naapertorlugu naatsorsuinermi, soraarnerussutisiaqarnissaq siunertaralugu ileqqaakkanit tunniussinissaq siulleq qaammatinik amerlanerpaamik marlunnik siqqullugu nalingat tunngavigineqassaaq. Naatsorsuinermi ilaassapput soraarnerussutisiaqarnissaq siunertaralugu ileqqaakkat aamma soraarnerussutisiaqarnissamut inuunermullu sillimmasiinermik aaqqissuussinerit tunniussiviusartut soraarnerussutisiaqarnissarlunniit siunertaralugu ileqqaakkanit tunniussinerup siulliup kingorna ukiut pingasut qaangiutinnginneranni tunniussiffiusalersinnaasut.</p> <p><i>Imm. 4.</i> Piginnittup soraarnerussutisiaqarnissaq siunertaralugu ileqqaagaasa aamma soraarnerussutisiaqarnissamut inuunermullu sillimmasiinermik aaqqissuussinerisa nali-</p>
--	--

	<p>ngat tamarmiusoq, tak. imm. 2 aamma 3, 700.000 kr.-init minneruppat, piginnittup soraarnerussutisiaqarnissaq siunertaralugu ileqqaakkat ilaat 100.000 kr.-it tikillugit ataasiartumik tigusinnaavai. Aningaasat sinneriunnaaat qaammammut 4.500 kr.-ikkaarlugit tunniunneqartassapput.</p> <p>§ 47 g. Aningaaseriviit soraarnerussutisiaqarnissaq siunertaralugu ileqqaakkanik piginnittunut ataasiakkaanut tunngatillugu ileqqaakkanut akiliutigineqartut ileqqaakkanillu tunniunneqartut tamarmiusut, ukiut tamaasa januarip qaammataa naatinnagu nalunaarutigisassavaat.</p> <p><i>Imm. 2.</i> Kikkulluunniit soraarnerussutisiaqarnissaq siunertaralugu ileqqaakkanit tunniussisut imaluunniit § 47 b, imm. 3-mi 4-milu aamma § 47 f, imm. 2-mi, 4-mi 5-imiluunniit taaneqartunik tunniussisut unerartitsisussaataasutut isigineqarput, tak. § 76, imm. 1 aamma 2, tamannalu malillugu akileraarutini A-nik, maleruagassat unerartitsisussaataasunut atuuttut naapertorlugit unerartitsissapput, akiliissallutik nalunaarutiginnissallutillu.</p> <p>§ 47 h. Aningaasarsianit akileraartussaati-taavoq piginnittoq, imaluunniit piginnittup toquneratigut tunniunneqartussanik pisinnaa-titaasoq, tak. § 47 b, imm. 2.</p> <p>§ 47 i. § 39, imm. 2, § 40 a, imm. 1, § 41, imm. 1 aamma 3, § 46, imm. 1-imiit 3-mut, aamma § 47 soraarnerussutisiaqarnissaq siunertaralugu ileqqaakkanut taamatutaaq atuutissapput.”</p>
<p>§ 57.</p> <p><i>Imm. 3.</i> Imm. 1 naapertorlugu aningaasat annertussusaat kisimiitsillugit akuerineqarsinnaasut ukiumi aningaasarsiorfimmi ataatsimi 50.000 koruuninit annerusinnaanngillat.</p>	<p>4. § 57, <i>imm. 3-mi</i> allaqqasoq ”100.000 koruuninit” allanngortinneqarpoq ima: ”350.000 koruuninit”</p>

<p>§ 57. <i>Stk. 3.</i> Imm. 1 naapertorlugu aningaasat annertussusaat kisimiitsillugit akuerineqarsinnaasut ukiumi aningaasarsiorfimmi ataatsimi 50.000 koruuninit annerusinnaanngillat.</p>	<p>5. § 57, imm. 3-mi oqaaseqatigiit aappaattut nutaatut ilanngunneqarput: ”Imm. 1 naapertorlugu akuersissut ukiumit qulinit sivisunerusumik atuussinnaanngilaq, aningaasallu akuerineqartut katillutik 3.500.000 kr.-init amerlanerusinnaanatik.”</p>
	<p style="text-align: center;">§ 2</p> <p>Inatsisartut inatsisaat 1. januar 2017-imi ator-tuulissaaq, taamaattorli tak. imm. 2. <i>Imm. 2.</i> § 47 c, imm. 2 aamma 3 atortuulis-sapput 1. januar 2020-mi. <i>Imm. 3.</i> Maannakkorpiaq aningaasarsiat Inissiani attartortittakkani ineqarnermut ta-piissutit pillugit Inatsisartut inatsisaat, Utoqqalinersiaqarneq pillugu Inatsisartut inatsisaat aamma Siusinaartumik pensionisiat pillugit Inatsisartut inatsisaat naapertorlugit naatsorsorneranni ilanngunneqassanngillat soraarnerussutisiaqarnissamut inuunermulluunniit sillimmasiiner-mut aaqqissuussinernut, inuuneq naallugu ingerlaavartumik tunniussiviusartussan-ut akiliutit, pensionisiaqarsinnaatitaasup imaluunniit sillimmasiisup aaqqissuussiner-mut akiliutit aningaasarsiat akileraaruteqaa-taasussat naatsorsorneranni ilanngaatisin-naanngippagit imaluunniit sulisitsisup akilee-qataassutai ilannguttussaappagit, tak. § 39 a, imm. 1 aamma 2.</p>

3. Pisortanut aningaasatigut allaffissornikkullu sunniutissai

Soraarnerussutisiaqarnissaq siunertaralugu ileqqaakkanut tunngatillugu naatsorsuutigineqar-poq siunnersuut aningaasanik soraarnerussutisiassanik nuussinermik kinguneqassasoq, tassa aningaaseriviit tamakkuninnga aaqqissuussisartut suliaasa ilaannik tigusinerisigut. Tamanna ataatsimut isigalugu akileraarutitigut isertitassanut sunniuteqangaarnaviannigilaq.

Soraarnerussutisiaqarnissamut aaqqissuussinernut nunani allaniittunut akiliutit ilanngaatigine-qarsinnaanerisa sulisitsisullu akileeqataassutaasa ilanngunneqartussaanninnerisa 1. januar 2017 aallarnerfigalugu atorunnaarsinneqarnissaasa kingunerisassa at inatsimmik allannguine-rmut 2016-imi upernaakkut ataatsimiinnermi (UPA 2016/21) akuersissutigineqartumut atatil-

lugu nalilersorniarnearput. Maanna paasissutissaatigineqartut tunngavigalugit naatsorsuutigineqarpoq inatsisissatut siunnersuut una UPA 2016/21-mi tunngavigineqartunik allannguinaarnavianngitsoq.

Naatsorsuutigineqassaarli innuttaasut ilaasa sulinerikkut soraarnerussutisiaqarnissamut aaq-qissuusinerminnut tapertaliullugu soraarnerussutisiaqarnissamut aningaaserivimmi aaqqisuussinermik pilersitsiumanissaat. Taakku tasaanerussapput innuttaasut aningaasaateqarnerusut ilanngaattissallu ilanngaatigineqartinnagit akissarsiat 20 pct.-iinik annerpaaffissaq tikillugu akiliuteqarumasut.

Innuttaasut aningaasaateqarnerusut ilaasa ilanngaattissat ilanngaatigineqartinnagit akissarsiat 20 pct.-iat tikillugu akiliuteqartarsinnaaneq atorpassuk tamanna akileraarutitigut isertitassatigut ukiumut 5 mio. kr.-it missinginik annaasaqaataasinnaavoq.

Kinguaariinnut tullernut nikisitsisarneq pillugu maleruagassat allannguutissaannut tunngatilugu naatsorsuutigineqarpoq siunnersuutip landskarsip kommunillu karsiisa isertitassaannut sunniuteqarnerlunnissaa, sunniutissaali annikitsuinnaasangatinneqarpoq, tassami kinguaariinnut tullernut nikisitsinermit il.il. atatillugu akileraarusiinissamik kinguartitsisinnaanerup anertoorujussuarmik atugaalernissaa naatsorsuutigineqanngimmat. Akileraarutitigut sunniutisai pingaarnertit ima nassuarneqarsinnaapput:

Suliffeqarfimmi sulisup akissarsiani, soorlu kinguaariinnut tullernut nikisitsinermit atasumik aktianik anpartinilluunniit pisissutigippagit akileraaruserneqarnissaat, aktiat anpartilluunniit inummut pingajuusumut tunineqarnissaasa tungaanut kinguartinneqartarpoq. Suliffeqarfiup nalinga taamak pisoqartinnagu apparpat suliffeqarfilluunniit akiliisinnaajunnaarpat tamanna akileraarusigassaarunnermik kinguneqassaaq. Taamaammat landskarsip akileraarutitigut isertitassani, akileraarusiinissap kinguartinneqarneratigut annaasinnaavai. Akerlianilli pisoqarneratigut suliffeqarfik ingerlalluarpat landskarsi kingusinnerusukkut, soorlu ukiut 10 -40-t qaangiunneranni akileraarutitigut isertitaqassaaq.

4. Inuussutissarsiutinik ingerlataqartunut aningaasatigut allaffissornikkullu sunniutissai

Siunnersuutip soraarnerussutisiaqarnissamut ileqqaarnissamik neqeroorutillit unammilleqatigiinnerulernissaannik kinguneqarnissaa naatsorsuutigineqarpoq. Taamaammat aningaasaqarnikkut ingerlatsiviit sullitaminnut neqeroorutinik unammillersinnaasunik, inatsisip kingunerisaanik neqeroorsinnaalernerikkut aningaasatigut iluanaaruteqarnissaat naatsorsuutigineqarpoq.

Siunnersuulli aamma tamakkuninnga neqerooruteqartunut allanut sunniuteqarnerlussangatinneqarpoq, taakkumi sullissamik ilaasa neqerooruteqartumut allanut nuunnissaat ilimagisinaammasuk.

Kinguaariinnut tullernut nikisitsineq pillugu maleruagassat allannguutaat eqqarsaatigalugit inatsisissatut siunnersuut inuussutissarsiutinik ingerlataqartunut pitsaasunik kinguneqassanganinneqarpoq, taakku kinguaariinnut tullernut nikisitsinissamut allanillu piginnittoqalernissamut periarfissagissaarnerulissammata. Tassuunakkut qulakkeerneqarsinnaavoq nukiit nutaat selskabimik ingerlatsillutillu ineriartortitsisinnaasut pigineqalernissaat.

5. Avatangiisinut pinngortitamut inuillu peqqissusiannut sunniutissai

Inatsisissatut siunnersuutip avatangiisinut pinngortitamulluunniit kinguneqarnissaa imaluunniit inuit peqqissusiannut sunniuteqarnissaa naatsorsuutigineqanngilaq.

6. Innuttaasunut sunniutissai

Soraarnerussutisiaqarnissaq siunertaralugu ileqqaarnissamik siunnersuut innuttaasunut pitsaasunik kinguneqassanganinneqarpoq, tassa soraarnerussutisiaqarnissamut ileqqaarnissamik neqeroorutillit unammillernerulerneerisigut.

7. Kingunerisinnaasai pingaarutillit allat

Inatsisissatut siunnersuut pingaarutilinnik allanik sunniuteqarnavianngilaq.

8. Oqartussaasunik kattuffinnillu il.il. tusarniaaneq

Siunnersuut piffissami 6.6.2016-imiit 4.7.2016-imut ukununnga tusarniaassutigineqarpoq:

SISA, PFA Soraarnej, Sulisitsisut (GE), KANUKOKA, Kommuneqarfik Sermersooq, GrønlandsBANKEN, Bank Nordik, Inuussutissarsiornermut, Suliffeqarnermut Niuernermullu Naalakkersuisoqarfik, Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut Naalakkersuisoqarfik, SIK

Tusarniarneqartut oqaaseqaataasa pingaarnersaat ataani nalinginnaasumik allallugit issuarneqarput, Naalakkersuisut akissutaat *uingasumik* allanneqartut.

Grønlandsbanken (GB)

Kinguaariinnut tullernut nikisitsinermi atugassarititaasunik pitsanngorsaaniissamik siunnersuut GB-p iluarisimaarpaa tassungalu oqaaseqaatissaqarani.

Aammattaaq aningaaseriviit soraarnerussutisiaqarnissamut aaqquissuussinernik sullitaminnut pilersitsisinnaalernerat aningaaseriviup iluarisimaarpaa. Aningaaseriviup naalakkersuisoqarfik

inatsisissatut siunnersuut pillugu oqaloqatigilaarsimavaa, oqaloqaatigiilluernerullu kingunerisaanik arlalitsigut pitsannngorsaasoqarluni. Kisianni inatsisissatut siunnersuut, aningaaseriviit soraarnerussutisiaqarnissamut kontunik pilersitsisinnaalernissaasa piviusunngornissaanut immikkoortutigut arlaqartutigut isummerfigisassanik sulii amigaateqarsorinarpoq.

Siunnersuutip nassuiarneqarnera tunngavigalugu qularnarpoq aningaaseriviit soraarnerussutisiaqarnissamut kontunik neqerooruteqarsinnaassasut. Tassungattaq pissutaavoq aningaaseriviit IT-mik sullissisuisa aqqissuussinerit eqqartorneqartut maannakkuugallartoq atortutigut piareersarsinnaagunangimmatigik, taamaattumillu IT-mik ineriartortitseqqaartoqartariaqarmat. Taamaannera aningaaserivinni aqqissuussinernik pilersitsinissamut akornutaalluinnasannersoq maannangaaq oqaatigineqarsinnaangilaq, tak. inatsisissatut siunnersuutip immikkoortutigut pingaarutilinnik amigaateqarnera. Nalornissuteqarnermut tassunga aqqiissutissatut siunnersuutigaarput ikaarsaariarnermi aqqissuussisoqarnissaa isumaliutigineqassasoq, ileqqaartut soraarnerussutisiaqarnissamut kontumut aningaaserivimmi akiliisassallutik, kontulu taanna kontup aqqivinneqarnissaata tungaanut parnaaqqassalluni. Immaqalu ileqqaagaqartoq toqussagaluarpat, soraarninngorpat allamilluunniit pisoqarpat aningaasat tunniunneqarnissaat pillugu iliuuserineqartartussamik aqukkuminartumik ilaqartillugu.

Tusarniaanermut akissut taanna tunngavigalugu aningaaserivinnit taakkunanga marlunnit Aningaasaqarnermullu Naalakkersuisoqarfimmit peqaaffigineqartumik ataatsimiittoqarpoq. Ataatsimiinnerup inerneraa Aningaasaqarnermut Naalakkersuisoqarfiup inatsisissatut siunnersuummik suliaqarneq GB-p tusarniaanermut akissutaa tunngavigalugu ingerlateqqissagaa, aningaaseriviillu tamatuma kingorna siunnersuummut oqaaseqaateqaaqinnissamut perarfissaqassasut. Aamma isumaqatigiissutaavoq aningaaseriviit IT-mik sullissisutik, inatsisissatut siunnersuutip IT-mut tunngasortaata piareersarsinnaanissaanik naliliinissaq siunertaralugu attavigissagaat.

Oqaaseqaatini nalinginnaasuni qupperneq 3-mi immikkoortoq 6-imi oqaatigineqarpoq, inuuneq naallugu tunniunneqartartussat kingunerissagaat soraarnerussutisiassanik piginnittup aningaasat atorsinnaasai amerlanerussasut, tassa soraarnerussutisi allip pisortanit pisartagaannarnik aningaasarsiaqarneranut sanilliullugu. Tamanna soorunami eqqortuuvoq. Kisianni soraarnerussutisi anik aqqiissuteqarneq ataatsimut isigalugu pingaartuuvoq nammineq soraarnerussutisiat, immaqalu isumaginninnikkut tunniunneqartartut ilanngarneqartarnerata imminnut ataqatigiinnerisa paasilluarneqarnissaat. Utoqqalinissamut ileqqaarnissap pilerinartuunissaa pingaaruteqarpoq, tamannalu pillugu erseqqissumik nassuiaanissaq inatsisissatut siunnersuutip saqqummiunneqarneranut atatillugu tulluartuusinnaavoq.

Utoqqalinissamut ileqqaarnissap pilerinartuunissaa Naalakkersuisut ilisimaaraat. Utoqqalinersiutit pillugit Inatsisartut inatsisaata nutaap siunertaasa ilagaat inuit ataasiakkaat soraarninngornissaminnut nammineerlutik ileqqaagaqarnissaannik pilerinarnerulersitsinissaq. Ta-

manna saniatigut aningaasarsiat ikilisikkiartuaarnissaannik allannguinnikkut pivoq. Taamaattoqarnissaa aamma isumaginninnerup tungaatigut inatsisit allat allanngortinneqarnerinut atatillugu ilaajumaarpoq.

Soraarnerussutisiaqarnissamut aningaaserivinni ileqqaakkanut akiliutigineqartartussat minnerpaaffissaasa annerpaaffissaasalu inatsimmi, inatsisini aalajangersakkanut aalajangersimasunut innersuussinikkut imaluunniit inatsisip oqaasertaani toqqaannartumik allassimanissaat nalinginnaasumik naleqquttuussaaq.

Soraarnerussutisiaqarnissaq siunertaralugu ileqqaakkanut akiliutit minnerpaaffissalersornissaat siunniussaangilaq. Soraarnerussutisiaqarnissaq siunertaralugu ileqqaakkanut akiliutit qanoq pisoqartillugu imminut akilersinnaanginnerat sullitat aningaaseriviisalu naliligassaraat. Siunnersuummi § 47-mi ilaatigut allaqqavoq akileraartarnermut inatsimmi § 41, imm. 1 soraarnerussutisiaqarnissaq siunertaralugu ileqqaakkanuttaaq atuuttoq. Tamanna isumaqarpoq akiliutit ilanngaaticineqarsinnaasut aningaasarsiat tamarmiusut 20 procentiinit amerlanerusinnaangitsut.

Aningaaserivutaaq siunnersuutigerusuppaa nappaatinut inuunermut navianartorsiortitsisunut sillimmasiineq ilanngunneqarsinnaassasoq. Tamanna akileraartarnermut inatsimmi § 34, nr. 19-imut naapertuutissaaq.

Siunnersuutigineqartoq ilanngunneqarpoq.

Kalaallit Nunaannissaaq soraarnerussutisiaqarnissamut aqqissuussinernut atatillugu sillimmasiinernik atuinerup ineriartortinneqarsinnaalernissaa GB-p kissaatiginartippaa. Tamanna soraarnerussutisiaqarnissamut uninngasuutit soorlu ataatsimoortunut sillimmasiinernik pisinermut atorneqarsinnaanerannik periarfissiissaaq, taannalu pingaartumik ileqqaartunut akiliutikitsunut (akissarsiakinnernut) soqutiginaateqarluinnassaaq.

Ataatsimoortunut sillimmasiinernut akiliutit ilanngaaticineqarsinnaangillat. Sillimmasiiner-nut taamaattunut aningaasartuutit nammineq isumagisassatut isigineqarput. Taamaattumik soraarnerussutisiaqarnissamut aningaasaateqarfiit ataatsimoortunut sillimmasiinernik piler-sitsisimasut ilaasortat ataasiakkaat akiliutaat akileraartarnermi oqartussaasunut ukiumoor-tumik nalunaarutigisussaavaat. Akiliutit aningaasarsiatut B-tut isigineqarput aningaasarsia-nullu akileraaruteqaataasussanut ilanngunneqartussaallutik. Ukiorpanni periuserineqartup taassuma inatsisissatut siunnersuummut matumunnga atatillugu allanngortinneqarnissaa pis-sutissaqarsorinangilaq.

Inatsisissatut siunnersuummi § 47 c, imm. 3-mut tunngatillugu inatsimmi oqaaseqaatinilu allassimavoq sullitaq 63-ileereersimappat imaluunniit soraarnerussutisiaqarnissamut aqqis-

suussinermut ukiuni kingullerni pingasuni akiliuteqarsimangippat oqimaaqatigiissaareqqittoqassasoq. Soraarnerussutisiaqarnissamut aaqqissuussinerit Kalaallit Nunaanni pilersinneqartut nutaajummata ikaarsaariarnermi aaqqissuussisoqarnissaa naleqquttuusaaq.

Siunnersuutigineqartoq ilanngunneqarpoq, tak. § 2, imm. 2.

Aktiat, aningaasaliiffissat akuleriiaat aamma obligationit suunerat erseqqissumik allasimangilaq.

”Aningaasaliiffissat akuleriiaat” § 47 c, imm. 2-mut oqaaseqaatini erseqqinnerusumik nas-suiarneqarput.

Soraarnerussutisiaqarnissamut ileqqaakkat tamarmiusut pappiaqqanik aningaasanik nalilinnik, pappiaqqanik aningaasanik nalilinnik atuutilersitsisartumit ataatsimit atuutilersinneqartunik pisinermut atorneqartut 20 procentiunissaannik imaluunniit 50.000 kr.-inik minnerpaaffeqarnissaannik killiliussat piffissamut pisiffiusumut attuumassuteqarnerisa inatsisissatut siunnersuummi § 47 d, imm. 2-mut tunngatillugu ilanngunneqarnissaa pitsaasuusaaq.

Siunnersuutigineqartoq ilanngunneqarpoq.

Inatsisissatut siunnersuummi § 47 e-mut tunngatillugu aningaaseriviup paaserusuppaa, kontumik piginnittup nalingat pillugu paasissutissiinera kisiat aningaaseriviup eqqortuusorissaneraa, imaluunniit aningaaserivik tamatuminnga tamatigut naliliisussaannersoq. Aningaaseriviup siunnersuutigaa naliliinerit taamaattut Akileraartarnermut Aqutsisoqarfiup isumagissagai.

Paasissutissat pineqartut nakkutigineqassappata tamanna Akileraartarnermut Aqutsisoqarfiup suliasaraa. Aamma takuuk ataani § 47 e, imm. 1 pillugu.

Inatsisissatut siunnersuummi § 47 f, imm. 2-mi pineqartussaapput akissarsiakinnerit akissarsi-aqqortunerillu. Taamaammat soraarnerussutisiaqarnissamut uninngasuutit ilaasa amerlanngitsut ataasiartumik tunniunneqarsinnaanissaat ilanngutissallugu pitsaalluinnartuusaaq. Assersuutigineqarsinnaavoq soraarnerussutisiaqarnissamut ileqqaagaqartussanut, soorlu 55-it 60-illu akornannik ukiulinnut kontunik amerlasuunik ukiuni qaninnerni pilersitsisoqarnissaa. Soraarnerussutisiaqarnissamut ileqqaartussat taakku amerlanersaasa inuuneq naallugu tunniunneqartartussanik amerlasuunik pisisinnaanissartik ilimagisinnaanaviannigilaat, soorluttaaq soraarnerussutisiaqarnissamut ileqqaagaqartunut aningaasartuutit qaffasissinnaasut. Tassunga uiggiullugu, inatsisissatut siunnersuutip Savalimmiuni assinga aningaaseriviup ilisimatitsissutigaa, tassa § 10, imm. 2-mi allasimammat: "Soraarnerussutisiaqarnissamut aaqqissuussiner-nik Savalimmiuni neqerooruteqartuni tamani soraarnerussutisiaqarnissamut ileqqaakkat tamarmiusut, § 9, imm. 2 naapertorlugu piffissami soraarninngorfissami 400.000 koruuninit

ikinneruppata, taarsiullugu 60.000 koruunit ataatsikkut tunniunneqarsinnaapput, sinnerilu qaammammut 2.500 koruunit tikillugit tunniunneqartassallutik." Kalaallit Nunaanni aaqqiineq assingusoq kissaatiginassaaq.

Siunnersuutigineqartoq ilanngunneqarpoq, tak. § 47 f, imm. 4 aamma 5.

Ileqqaagaqartup soorlu 60-inik ukioqalereerluni, aaqqissuussinermillu tunniussisarneq allarte-reersoq akiliisarnerminik nangitsisinnaanera allassimangilaq.

Tamanna § 47 f-imut oqaaseqaatini erseqqissaassutigineqarpoq.

Inatsisissatut siunnersuummi allassimavoq inuunermut sillimmasiisarfinni aaqqissuussinernik inuuneq naallugu tunniussiviusartussanik pisisoqarsinnaasoq. Tamatuma aaqqissuussinerit aningaasartakitsut eqqarsaatigalugit piviusorsioruunera qularaarput. Periarfissaq alla aqukku-minarnerusussaq tassaasinnaavoq soorlu ukiuni 20-ni tunniussisarsinnaaneq, tamannami inuuneq naallugu tunniussisarnissamut qanittuussammat.

Ajornartorsiut § 47 f, imm. 4-kkut 5-ikkullu aaqqinneqarsorinarpoq.

Aaqqissuussinerup piffissami tunniussiviusartussami nalingata allanngorarnissaa qanoq aaq-qiivigineqassanersoq takuneqarsinnaanngilaq.

§ 47 f, imm. 2-mut oqaaseqaatit innersuussutigineqarput.

Ileqqaagaqartoq Kalaallit Nunaanniit nuussimatillugu soraarnerussutisiaqarnissamut aaqqis-suussinerup aningaasarsianit Kalaallit Nunaannut akileraarutit nalinginnaasut akilerlugit naat-sorsorneqarsinnaalernissaa aningaaseriviup naggataatigut siunnersuutigerusuppaa. Tassunga pissutaavoq kontut taamaattut aningaaserivimmu/sullitamut allaffissornermut ukiumut aningaasartuuteqartitsisarnerat, taamaattumillu sullitaq Kalaallit Nunaanniit nuussimatillugu uninngasuutit aningaasartakitsut sullitamut/aningaaserivimmu aningaasartuutaannaasarmata.

Ajornartorsiut § 47 f, imm. 5-ikkut aaqqeriarneqarpoq.

Grønlandsbanken naliliivoq soraarnerussutisiaqarnermut tunngasut, soraarnerussutisiaqarnis-samut pinngitsoorani ileqqaartussaataitaneq pillugu inatsiseqarneq ilanngullugu ima annertuti-gisut, allaat piareersarluarnerunissaq aammalu toqqaannartumik malitsigisaanillu sunniutissat paasilluarnerunissaat pisariaqartut. Taamaammat aningaaseriviup tusarniaanermut akissutaa tamakkiisuususut isigineqassanngilaq, misissueqqinnerimmi ajornartorsiutinik nutaanik qulaarisinnaapput. Taamaammat siusinnerusukku oqaatigeriikkatsituut inassutigilluinnassavarput ilimasagarluartunik inuttalimmik ataatsimiititaliortoqassasoq, soraarnerussutisianut tunngasu-

nik aamma ”soraarnerussutisiaqarnissamut pinngitsoorani ileqqaartussaaneq” aamma ”Soraarnerussutisiaqarnissamut aningaaserivinni ileqqaarneq” pillugit inatsisiliarineqartunik, kingunerisassaannik inatsisinullu allanut attuumassuteqarnerannik qulaajaasinnaasumik.

Tamatumunnga tunngatillugu ilisimasaqarluartunik inuttalimmik ataatsimiititaliornissaq Naalackersuisut maannakkut pilersaarutiginnilaat. Ajornartorsiutinik tamatumunnga tunngasunik saqqummersoqassappat, taakku inatsisinik allanngueqqittariaqarnermik kingunerisassaannik Naalackersuisut isummernissaanni ilanngunneqarumaarput.

Tamatuma, naak nalorninartoqaraluartoq, inatsisiliuunnissaa periarfissiuunniarlugu siusinnerusukkut oqaatigineqareersutuut siunneruutigissavarput ikaarsaariarnermi aqqissuussinermik atuutilersitsisoqarnissaa isumaliutigineqassasoq, tassa aningaasat soraarnerussutisiaqarnissamut ileqqaarneqartut periusissaq erseqqinnerusoq aalajangersarneqarserlugu kontumut ikineqartarlutik.

Taamatut aaqqiinissaq nalorninartortalerujussuussaaq, matumani aamma soraarnerussutisiaqarnissamut ileqqaagaqartunut, tassa ileqqaakkaminnut tunngatillugu siunissami atugassarissatik eqqarsaatigalugit. Taamaammat Naalackersuisut siunnersuutigineqartoq isumaqatigisinnaanngilaat.

Qulaani Grønlandsbanken-ip tusarniaanermi akissuteqaataa tunuliaqutaralugu Grønlandbanken, Banknordik aamma Aningaasaqarnermut Naalackersuisoqarfiup akornanni oqaloqatigiittoqarpoq, taamaasillutik aningaaseriviit taakku marluk inatsisissatut siunnersuummut missingiut nutartigaq oqaaseqarfiginissaannut periarfissinneqarput. Tamanna inatsisissatut siunnersuut nutartigaq pillugu tusarniaaniviunngimmat ataani Grønlandsbankenip oqaaseqaatai pingaernerpaat kisimik ilanngunneqarput.

Grønlandsbanken isumaqarpoq § 46, imm. 5-imi, 5.000 kr.-inik annikitsumik killiliineq appasippallaartoq.

Annikitsumik killiliineq 10.000 kr.-inut qaffanneqarpoq.

Grønlandsbanken-ip siunnersuutigaa, § 47 c, imm. 1 aamma § 47 d, imm. 2-mi oqaatsit allanngortinneqassasut, aktiat taamaasillutik aktianik ataasiakkaanik taarserneqarput.

Malittarisassanik pineqartunik aningaasaliinerit siammarnissaannik qulakkeerinissamik anguniarneqarpoq. Aktiat nioqqutillu katitikkat obligationinik assigisaanillu nioqqutinik aarlerinaateqarneruneri eqqarsaatigalugu, aktianik nioqqutinillu katitikkanik uninngasuutinik qanoq annertutigisumik aningaasaliisinnaanissaq pillugu killiliisoqarpoq.

Grønlandsbanken-ip oqaatigaa, siunnersuummi § 47, imm. 3, immaqaa pisariaqanngikkaluartoq, niueqatigiiffimmut nalunaarsorsimasuinnaat aningaasaliiffigineqarsinnaammata.

Aalajangersakkap piviusumik annertuumik pingaaruteqarnissaa naatsorsuutigineqanngikkaluarpoq. Aalajangersagarli atatiinnarneqarpoq, ilaqutariit ataasiakkaat ingerlatseqatigiiffinni niueqatigiiffimmut nalunaarsorsimasuni annertuumk piginneqataaneri ilaatigut takussaasarmata.

Grønlandsbanken isumaqarpoq soraarnerussutisiaqarnissamut ileqqaakkat 25.000 kr.-t ataakkaagagit ataatsikkut tamaasa tiguneqarsinnaanissaanut immikkut malittarisassaliornissaq pisariaqanngitsoq, tamanna § 47, imm. 4.-mi ilaareermat.

Siunnersuut ilanngunneqarpoq.

Grønlandsbanken aningaaseriviup Edb-centralia attavigisimavaa naliliinerlu tassaavoq, aningaaseriviup systemiisa IT-systemimik tulluarsaareernikkut aaqqiissut ingerlassinnaagaa.

Sulisitsisut (GE)

Soraarnerussutisiaqarnissamut nunatsinni aningaaserivinni ileqqaakkanut akileraaruteqanngitsumik akiliisarsinnaanissamik aaqqiissuussiniarneq GE-p iluarisimaarppaa. Aningaaseriviit akuutinneqarnissaat, teknikkikkullu aaqqiissutissanik aningaaserivinni atorneqarsinnaasunik ataatsimoorluni nassaarniartoqarnissaa GE-p inassutigaa. Taamaammat ilisimasaqarluartunik inuttalimmik, aaqqiissutaasinnaasunik piviusorsioortunik misissuisussamik suleqatigiissitaliortoqarnissaa pingaartuuvoq.

Ilaatigut siunnersuutip teknikkimut tunngasortai qulakkeerniarlugit Grønlandsbanken aamma BankNordik, inatsisissatut siunnersuutip tusarniaassutigineqartup piareersarneqarnerani ingerlaavartumik akuutinneqarput.

GE isumaqarpoq, soraarnerussutisiaqarnissamut ileqqaakkat eqqarsaatigalugit, matumani pingaartumik isumaginninnermi inatsisit, ineqarnermut tapiissutit il.il. sutigut imminnut apo-raannersut unammillernartortaqaarnersullu oqaaseqaatini erseqqissumik allaaserineqartariaqartut. Soraarnerussutisiaqarnissamut ileqqaagaqarnissaq aningaasatigut pilerinartuussaaq, soraarnerussutisiaqarnissamut ileqqaakkat tamarmik isumaginninnikkut tapiissutini tunniunneqartartunilu ilanngaatigineqartaqqunagit.

Nammineerluni soraarnerussutisiassat tunniunneqarnerisigut innuttaasup utoqqalinersiutaa sa imaluunniit isumaginninnikkut tunniunneqartartut allat ikileriarujussuarnissaannik ajornartorsiutaalersinnaasut GE-mit eqqarsaatigineqartut ilimagineqarpoq. Utoqqalinersiutit

pillugit Inatsisartut inatsisaatigut nr. 20, 23. november 2015-imeersukkut siunertarineqartut pingaarnerit ilagaat utoqqalinersiutit innuttaasullu aningaasarsiaasa allat, aamma nammineerluni soraarnerussutisiaatigut isertitat imminnut naleqqussarneqarnerunissaat. Utoqqalinersiutit pillugit inatsimmik nutarterinerup kinguneraa soraarnerussutisiaqarnissamut nammineerluni ileqqaakkatigut, immaqalu sulinikkut aningaasarsiatigut pissarsiat amerlinerat. Tassunga pissutaavoq utoqqalinersiutinut tapit appartikkiartuaarneqarnissaannut procentip 45 pct.-imut aammalu utoqqalinersiutit tunngaviusut 50 pct.-imut appartinneqarnerat, appartikkiartuaarneqarnissaannut procenti siusinnerusukkut 70 pct.-iusimagaluartoq.

Sillimmasiinerit suut siunnersuummut ilanngunneqartariaqarnersut misissorneqartariaqarpoq. Ilaatigut pineqarput navianartumik ajutoornermi sillimmasiineq aamma ataasiartumik tunnius-sisinnaaneq, matumani aamma soraarnerussutisiaqarnissamut aaqqissuussinernik atorunnaarsitsisoqarneranut atatillugu aamma tamakkuninnga nuussineq.

Sillimmasiinernut akiliutinut aningaasartuutit aningaasarsiat akileraaruteqaataasussat naat-sorsorneranni ilanngaatigineqarsinnaanerat nalinginnaanngilaq, aatsaalli aningaasartuutit inuussutissarsiummik ingerlataqarnermut atatillugu aningaasartuutigineqarpata. Kisianni in-narluutilittut ingerlaavartumik pensionisiaqarnissamut aamma nappaatit inuunermut navia-nartorsiortitsisut ilaannut sillimmasiinernut aningaasartuutit ilanngaatigineqarsinnaapput. Soraarnerussutisiaqarnissaq siunertaralugu ileqqaakkat soraarnerussutisiaqarnissamut aaq-qissuussinernit allanit tamatuma tungaatigut pineqarnissaat inatsisissatut siunnersuutikkut si-unertaanngilaq.

Ilisimasaqarluartunik inuttalimmik, ajornartorsiutinik tusarniaanermut akissummi taagorne-qartunik qulaajaasussamik aammalu inatsisissatut siunnersuutip soraarnerussutisiaqarnissamut pinngitsoorani ileqqaagaqarnissaq pillugu inatsisissatut siunnersuummut attuumassuteqarne-ranik misissuisussamik ataatsimiititaliortoqarnissaa GE-p inassutigaa.

Ilisimasaqarluartunik inuttalimmik ataatsimiititaliornissaq Naalakkersuisut, paasissutissat pi-gineqartut tunngavigalugit pisariaqarsorinngilaat. Inatsisissatut siunnersuut soraarnerussuti-sianut tunngasutigut unammillersinnaanerup pitsannorsarniarneqarneranik pissuteqarpoq. Naalakkersuisut naliliipput suliffeqarfiiit sulisuisalu amerlasuut, soraarnerussutisiaqarnissa-mut siunissami ileqqaagassaminnik piffissami aggersumi qaninnermi isumaliutiginninnermin-ni, aammattaaq nunatsinni aningaaserivinni ileqqaagaqarsinnaanertik paasissallugu nuan-naartutigissagaat.

SISA

SISA-p tikkuarppaa, soraarnerussutisiaqarnissaq siunertaralugu ileqqaakkanik aningaaseriviit akornanni nuussinerup tunniussinertut akiliinertullu isigineqannginnissaa kisiat § 47 e, imm. 2-p periarfissikkaa. Soraarnerussutisiaqarnissamut ileqqaarneq sunniuteqarluartoq qinigassa-

qarfiulluarterlu qulakkeerneqassappat, soraarnerussutisiaqarnissaq siunertaralugu ileqqaakkat aningaaseriviit soraarnerussutisiaqarnissamullu aningaasaateqarfiit Kalaallit Nunaanni angerlarsimaffeqartut akornanni taamatulli nuunneqarsinnaanissaannik periarfissiisoqarnissaa SISA-p siunnersuutigaa, tassa nuussineq tunniussinertut akiliinertullu isigineqarani. Ileqqaakkat minnerpaamik affaasa inuuneq naallugu tunniunneqartartuunissaat pillugu aalajangersak-kap § 47 f, imm. 2, nr. 1-imi siunnersuutigineqartup ersersippaa, aningaaserivinniit soraarnerussutisiaqarnissamut aningaasaateqarfinnut nuussisinnaanissamik periarfissiinissaq pisariaqartoq.

Siunnersuutigineqartoq ilanngunneqarpoq.

KNAPK

Kinguaariinnut tullernut nikisitsinermut atatillugu aningaasanut killiliussanik allannguneq KNAPK-p tapersorsorpaa.

KNAPK isumaqarpoq inatsisissatut siunnersuut pitsaasuusoq. Soraarnerussutisiaqarnissamut ileqqaarnissap unammillerfiunerulernissaanik suliniutit suulluunniit pitsaasuupput. Kinguaajusut ileqqaakkanik, piginnittup toquneranut atatillugu tunineqarsinnaanerat pitsanngorsarneqartariaqarpoq. Toqusoqartillugu automatiskimik pisartut amerlanerusariaqarput, soorlu aningaasat torersumik, eqqartuussissuserisut assigisaallu akuliutitinngikkaluarlugit qimagaasunut tunniunneqartussanngorlugit.

Kingornussassaqartitsisup aningaasat soraarnerussutisiaqarnissaq siunertaralugu ileqqaakkaniittut qanoq agguataagaanissaannik kissaateqarnerata qimagaasunit paasiuminarnerunissaa § 47 b, imm. 2-p siunertaraa.

Bank Nordik Moderniseringsstyrelsen aamma IMAK siunnersuummut oqaaseqaatissaqanngillat.

Inatsisissatut siunnersuummi aalajangersakkanut ataasiakkaanut oqaaseqatit

§ 1-imut

N. 1-imut.

Soraarnerussutisiaqarnissamut inuunermullu sillimmasiisarfiit kiisalu aningaaseriviit allaffis-sornikkut suliassaat annikillisarniarlugit siunnersuutigineqarpoq piffissaq suli nallinngitsaq atorunnaarsitsisoqartillugu akileraarutit, soraarnerussutisiaqarnissamut imaluunniit inuuner-mut sillimmasiineramik aaqqissuussinermut imaluunniit soraarnerussutisiaqarnissaq siunertara-lugu ileqqaakkanut qaammatini kingullerni 23-ni akiliisoqarsimangippat akilersinneqassan-ngitsut. Piumasaqaataassaarli aaqqissuussinerup ileqqaakkalluunniit piffissami atorunnaarsit-siffiusumi nalingat 5.000 kr.-init minnerussasoq.

Aningaasanik taakkuninnga tunniussinerit pissarsisumut akileraaruteqaataassapput, akileraa-rutillu A-t taakkunanga unerartinneqassallutik.

Nr. 2-mut

Kapitali 5-ip siornagut kapitalimik nutaamik 4 a-mik ima qulequtalimmik ilanngussisoqarnis-saa ”Soraarnerussutisiaqarnissaq siunertaralugu ileqqaakkat” siunnersuutaavoq.

Nr. 3-mut

§ 47 a-mut.

Imm. 1-imut.

Kapitalimi nutaami maleruagassat soraarnerussutisiaqarnissaq siunertaralugu aningaaserivinni Kalaallit Nunaanni angerlarsimaffeqartuni imaluunniit aalajangersimasumik ingerlatsiveqar-tuni, aammalu Kalaallit Nunaanni aningaaseriveqarnermik ingerlatsinissamut Finanstilsynimit akuerisaasuni ileqqaarnermut atorneqarnissaat siunnersuutaavoq.

Tamatuma kingunerissavaa aningaaseriviit Kalaallit Nunaanni angerlarsimaffeqanngitsut aa-lajangersimasumilluunniit ingerlatsiveqanngitsut imaluunniit Kalaallit Nunaanni aningaaseri-veqarnermik ingerlatsinissamut akuersissuteqarfigineqanngitsut kapitali 4 a-mi maleruagassa-ni pineqartunut ilaanginnissaat.

Aalajangersimasumik ingerlatsiveqarnek tassaavoq aningaaseriviit ingerlatsinerat § 2, imm. 1, nr. 10-mi pineqartunut ilaasoq.

§ 47 b-mut.

Imm. 1-imut.

Soraarnerussutisiaqarnissaq siunertaralugu aningaaserivinni ileqqaakkat piginnittup kontuinit aningaaseriviullu neqeroorutaanit allanit avissaarsimatilluinnarneqassapput. (Ileqqaakkat piginnittup pigisaanit allanit avissaarsimatilluinnarneqassapput, soorluttaaq ileqqaakkat piginnittunit ataasiakkaanit pigineqarnerisa erseqqissuunissaat qulakkeerneqassasoq).

Imm. 2-mut.

Soraarnerussutisiaqarnissamut uninngasuutitut kontumi aningaasaatit il.il. kontumik piginnittumut tunniunneqartussaanerat allassimassaaq. Inuit kisimik soraarnerussutisiaqarnissamut uninngasuutitut kontumik piginnittutut isigineqarsinnaapput. Soraarnerussutisiaqarnissamut uninngasuutitut kontumut akiliisinnaapput kontumik piginnittoq allallu, soorlu piginnittup sulisitsisua, piginnittup aappaarisaa assigisaalluunniit.

Soraarnerussutisiaqarnissamut uninngasuutitut kontup pilersinneqarneranut atatillugu piginnittoq, piginnittoq toqussagaluarpat aningaasat il.il. kikkunnt tunniunneqarnissaat pillugu aalajangersaassaaq. Piginnittup aalajangiisimaneq taanna kingusinnerusukkut allanngortissinnaavaa aningaaseriviup tamatuminnga nalunaarfigineratigut.

Aappaasunut, inooqatigisanut qitornanullu qimagaasunut § 39, imm. 1, nr. 4-imi aamma 6-imi taaneqartunut taamaallaat tunniussisoqarnissaanik aalajangersaasoqarsinnaavoq. Aamma § 39, imm. 1, nr. 4-mi aalajangersakkat taamatuttaaq atuutissapput.

Piginnittoq toquppat soraarnerussutisiaqarnissaq siunertaralugu ileqqaakkani uninngasuutit aappaasumut qimagaasumut, aappaasumut avissimasamut, inooqatigisamut imaluunniit qitornamut qimagaasumut tunniunneqarsinnaapput. Inooqatigisaq tassaavoq inuk aqqatigut taasaq, toqusup pisassanngortitsinerup nalaani najugaqatigisimasaa, imaluunniit inuk toqusup 1) katissimasinnaasaralua imaluunniit nalunaarsugaasumik inooqatigisimasinnaasaralua aamma 2) testamentiliormigut, aappaasup pinngitsoorani kingornussassaasa minnerpaamik angeqqaataannik kingornussisussanngortissimasaa. Testamenti toqussaq qaammatinik pingasunik sioqqullugu pilersinneqarsimassaaq, aamma 3) toqussaq sioqqullugu ukiuni kingullerni marlunni najugaqatigisimasaa, imaluunniit siusinnerusukkut piffissami atasuinnarmi sivikinnerpaamik ukiuni marlunni najugaqatigisimasaa, najugaqatigiinneq paaqqinniffimmut, matumani aamma utoqqaat najugaqarfiannut inissinneqarneq pissutigiiinnarlugu kipitinneqarsimappat. Inooqatigisaq aamma tassaasinnaavoq inuk toqusup piffissami toqqimmini najugaqatigisimasaa toqusulluunniit siusinnerusukkut najugaqatigisimasaa, najugaqatigiinneq paaqqinniffimmut, matumani aamma utoqqaat najugaqarfiannut inissinneqarneq pissutigiiinnarlugu kipitinneqarsimappat, aamma toqusumit naartusoq, qitornaqartoq qitornaqarsimasorluunniit.

Aappaasumut, inooqatigisamut qitornanullu qimagaasunut tunniunneqartut pissarsisut aningaasarsiaasa akileraaruteqaataasussat naatsorsorneranni ilanngunneqassapput, tak. § 47 h.

Imm. 3-mut.

Piginnittumut tunniussineq pisinnaavoq piginnittoq, Siusinaartumik pensionisiat pillugit Inatsisartut inatsisaat naapertorlugu siusinaartumik pensionisiaqalersinneqarpat.

Aammattaaq piginnittumut tunniussineq pisinnaavoq piginnittoq nappaammit inuunermut ulorianartorsiortitsisumit eqqorneqarpat. Nappaatit inuunermut ulorianartorsiortitsisutut isigineqartut ilaatigut tassaapput kræfti, uummatip taqaagut milittoorneq, uummatip taqaasa qerattarsimanerannik pissuteqartumik uummatikkut suliaritissimaneq, uummatip taqaanut matusartulersissimaneq, qaratsakkut aanaartoorsimaneq, qaratsakkut taqqanik tillertunik suangartoor-simaneq, qitiusumik sianiuteqarfikkut nappaateqarneq (sklerose), sianiutit timimik aalatitsisut sananeqaataasa ajoquteqarnerat (ALS), nukiit nungujartornerat nukiillu sianiuteqarfiisigut nappaateqarneq, HIV-imik tunillatsissimaneq, tartut sulilluarunnaarsimanerat, timip pisataasa annertuut taarserneqarsimanerat. Matumani taagorneqartut tamakkiisuunnigillat taamaattumillu nalunaarummut, soraarnerussutisiaqarnissamut aaqqissuussinerit ilaasa inuunermut navianaatilinnik nappaateqalernermi tunniunneqartarnerat pillugu danskit akileraartarnermut ministerianit atuutilersinneqartumut naleqqussarneqassallutik.

Inuup inuunermut navianartorsiortitsisumik nappaateqarnini pissutigalugu soraarnerussutisiaqarnissaq siunertaralugu ileqqaakkanik atorunnaarsitsiniartup tunniussinissamilluunniit piumasaqarniartup, nappaatini inuunermut navianartoq taanna pillugu uppernarsaat, akileraarutit naatsorsorneqarnissaanni atugassaq aningaaserivimmuut susassaartumut tunniutissavaa. Uppernarsat nakorsamit atsiorneqarsimasoq uppernarsaatigineqassaaq.

Tunniunneqartut piginnittumut akileraaruteqaataassapput, tak. § 47 h.

Imm. 4-mut.

Siunnersuutaavoq innarluutilittut pensionisiaqarnissamut sillimmasiinerimik ingerlaavartumik tunniussiviusartussamik aamma nappaatit inuunermut navianartorsiortitsisut ilaannut sillimmasiinerimik, soraarnerussutisiaqarnissaq siunertaralugu ileqqaakkanut atatillugu pilersitsisoqarsinnaassasoq.

Soraarnerussutisiaqarnissamut uninngasuutinut kontumut akiliutaasartut qaffanneqarpata, akiliutaasartullu innarluutilittut pensionisiaqarnissamut sillimmasiinerimut ingerlaavartumik tunniussiviusartussamut aamma nappaatit inuunermut navianartorsiortitsisut ilaannut sillimmasiinerimut matussutaappata akiliutit ileqqaagaqartumut akileraaruteqaataassanngillat.

Innarluuteqalernissamut sillimmasiissut sillimmasiineruvoq sillimmaserneqartoq nappaammik pissuteqartumik imaluunniit ajoqusernini pissutigalugu inuussutissarsiorsinnaanermik an-

naasaqarpat, tassa imaappoq inuussutissarsiummi sulisutut akissarsiorsinnaajunnaarpat, tunniunneqartussa.

Innarluutilittut soraarnerussutisiat ingerlaavartumik tunniunneqartartut ileqqaakkanik piginnittup aningaasarsiaasa akileraaruteqaataassussat naatsorsorneranni ilanngunneqassapput, sillimaserneqartup sillimasiinermut akiliutigisimasaminik, aningaasarsiat akileraaruteqaataassussat Danmarkimi, Savalimmiuni Kalaallilluunniit Nunaanni naatsorsorneqarneranni tamakkiisumik ilaannakuusumilluunniit ilanngaateqartinneqarsimannginnini sulisitsisulluunniit akileeqaataassutaasa ilanngunneqartussaannginnerisa atuutsinneqarsimannginnera uppersarsinnaanngippagu, tak. akileraartarnermi inatsimmi § 34, nr. 18.

Innarluuteqalernermi taartisiat aningaasanngorlugit ataatsikkut tunniunneqartut, piffissap sillimasiiffittut isumaqatigiissutaasimasup qaangiutinnginnerani tunniunneqarunik akileraaruteqaataasussaannngillat, atorunnaarfissaatut isumaqatigiissutigineqartoq sillimmasersimasup 80-inik ukioqalernerata kingorna ullormit policep atuuffianit siullermit kingusinnerunngippat, tak. akileraartarnermi inatsimmi § 34, nr. 17.

Taaguut ”nappaatit inuunermut navianartorsior-titsisut ilaat” nappaatinut assigiinngitsunut sillimmasiissummi pineqartunut ataatsimut taaguutaavoq. Nappaatinut sunut sillimmasigaaneq sillimmasiisarfinni assigiinngitsuni assigiinngissuteqarpoq. Aamma nappaatit navianartorsior-titsisut sordiaanissaannut piunasaqaatit assigiinngissuteqarsinnaapput.

Sillimaserneqartoq nappaatit navianartorsior-titsisut sillimasiinermut piunasaqaatini taaneqartut arlaannit eqqorneqassagaluaruni aningaasanik ataasiartumik tunniunneqartussanik tunineqassaaq. Sillimaserneqartup aningaasat sumut atorneqarnissaat nammineq aalajangigassaraa.

Nappaatit inuunermut navianartorsior-titsisut ilaannut sillimasiinermi tunniunneqartut ileqqaakkanik piginnittup aningaasarsiaanut akileraaruteqaataasussanut ilanngunneqassapput, sillimaserneqartup sillimasiinermut akiliutit Danmarkimi, Savalimmiuni imaluunniit Kalaallit Nunaanni aningaasarsiat akileraaruteqaataasussat naatsorsorneranni tamakkiisumik ilaannakuusumilluunniit ilanngaateqarsinnaasimannginnerat imaluunniit sulisitsisup akileeqaataassutaasa ilanngunneqarsimanerat uppersarsinnaanngippagu, tak. akileraartarnermut inatsimmi § 34, nr. 19.

Imm. 5-imut.

Soraarnerussutisiaqarnissaq siunertaralugu ileqqaakkanut imm. 1 naapertorlugu akiliutit aningaasarsiat akileraaruteqaataasussat naatsorsorneranni ilanngaateqarsinnaapput.

Piginnittup aningaasarsiaanit akileraaruteqaataasussanit taamaallaat ilanngaateqartoqarsinnaavoq. Taamaammat aappaasup aapparmi soraarnerussutisiaqarnissamut aningaaserivimmi ileqqaaganut akiliutini ilanngaatigisinnaanngilai.

Ilanngaateqarsinnaaneq atorunnaassaaq piginnittoq nunamut maanga tamakkiisumik akileraartussaataajunnaarpat. Tassa imaappoq soraarnerussutisiaqarnissamut uninngasuutinut kontunut, inunnit killilimmik akileraartussaataasunit pigineqartunut akiliutit ilanngaatigineqarsinnaanngillat.

Imm. 6-imut.

Sulisitsisup soraarnerussutisiaqarnissaq siunertaralugu ileqqaakkanut akileeqataassutai sulisup aningaasarsiaasa akileraaruteqaataasussat naatsorsorneranni ilanngunneqassanngillat.

Sulisitsisup akileeqataassutaata ilanngunneqartussaannginnera ukiumi, soraarnerussutisiaqarnissaq pillugu isumaqatigiissut naapertorlugu akiligassanngorfimmini pissaaq, akilerneqarnera akilerneqannginneraluunniit apeqqutaatinnagu.

Sulisitsisup akileeqataassutaasa ilanngunneqartussaannginnerat piginnittoq Kalaallit Nunaanut tamakkiisumik akileraartussaataajunnaarpat atorunnaassaaq. Tassa sulisitsisup akileeqataassutaasa ilanngunneqartussaannginnerat soraarnerussutisiaqarnissamut uninngasuutinut kontunut, inunnit killilimmik akileraartussaataasunit pigineqartunut akiliutigineqartunut atuutinngilaq.

Imm. 7-imut.

Marloriaammik akileraarusiinissaq pinaversaartinniarlugu siunnersuutigineqarpoq, soraarnerussutisiaqarnissamut ileqqaakkat iluanaarutitaasa akileraaruserneqannginnissaat. Tamatuma kingunerissavaa iluanaarutisiat selskabinit peqatigiiffinnillu Kalaallit Nunaanni angerlarsimaffeqartunit iluanaarutisiaritineqartut akileraarutaannik unerartitsisoqannginnissaa, tassa iluanaarutisiat soraarnerussutisiaqarnissaq siunertaralugu ileqqaakkanut tunniunneqarpata. Unerartitsinnginnissami pineqarput iluanaarutisiat § 86, imm. 1-imi 2-milu taaneqartut. Soraarnerussutisiaqarnissamut ileqqaakkat annaasaqaatitariunagaat aningaasarsianit allanit ilanngaatigineqarsinnaanngillat. Soraarnerussutisiaqarnissaq siunertaralugu ileqqaakkanik piginnittup tunngavittut qulakkiigassaraa, pissarsiasanik akiliinermi, akiliisussap akiliinermut atatillugu paasissutissanik pisarialinnik tigummiaraqarnissaa.

§ 47 c-mut.

Imm. 1-imut

Soraarnerussutisiaqarnissamut uninngasuutinut kontumik piginnittup uninngasuutit tamakkerlugit ilaalluunniit pappiaqqanik aningaasanik nalilinnik assigisaannilluunniit pisissutigisinnava, taamaaliornissarluunniit allanut isumaqatigiissutigalugu.

Nalorninaateqarsinnaasunulli mianersortumik siammaanissaq qulakkeerniarlugu maleruagassat atuuttut tamatigut nakkutigineqartassapput. Aktiat aamma aningaasaliiffissat akuleriiaat obligationinit assigisaanillu aningaasaliiffissanit nalorninassuseqarnerunerat eqqarsaatigalugu killiliussanik ilanngussisoqarpoq, tassa uninngasuutit tamarmiusut ilaat qanoq amerlatigisut aktianik aamma aningaasaliiffissanik akuleriiaanik pisinissamut atorneqarsinnaanerat pillugu. Aningaasaliissuteqartarnermut peqatigiiffinnit allagartanik aningaasaliinerni ilanngullugiit naatsorsorneqartarput aktiat, obligationit il.il. peqatigiiffiup aningaasaliissutai, aningaasaliissuteqartarnermut peqatigiiffinnit aningaasaliissutit naatsorsorneqartarnerattut.

Nalorninarsinnaasunut aningaasaliinerup piginnittup ukioqqortusiartornera ilutigalugu milliar-tortinneqartariaqarnera killiliussat aalajangersarneranni eqqarsaatigineqarpoq.

Imm. 2-mut.

Aningaasaliiffissanut killiliussat imm. 1-imiittut qaangerneqartillugit oqimaaqatigiissaareqqit-toqartussaavoq. Naatsorsuineq qaammatit ulluisa kingullersaanni pisassaaq.

Oqimaaqatigiissaareqqinnerup inatsimmi matumani pineqarnera ima paasineqassaaq, soraarnerussutisiaqarnissamut uninngasuutinut kontumik piginnittup aningaasaliiffigisimasami katitigaanerannik allangortitsisarnera, aningaasaliissutit tamarmiusut pigisanut assigiinngitsunut ataasiakkaanut agguataagaanerat tassuunakkut allangortillugu.

Oqimaaqatigiissaareqqinneq tassaanusassaaq pigisap pineqartup ilaanik tunisineq. Tassunga atatillugu tunisineq aamma tassaasinnaavoq piginnittup pigisap nammineq tigoriarlugu, nammineq aningaasaatini atorlugit taassuma nalinganik soraarnerussutisiaqarnissaaq siunertarlugu ileqqaakkaminut akiliinera, tak. § 47 e.

Tassa imaanniartussaavoq piginnittup amerlanerpaaffissatut killiliussanik imm. 1-imi pineqartunik malinnittup aktiat aamma aningaasaliiffissat akuleriiaat agguataarnerat, pineqartup tabbellimi killiffini killiffimmut allamut nuukkaangat ikilisittassagai. Tamatutaaq aamma pappialat aningaasanik nalillit nalingisa allangoriartornerat oqimaaqatigiissaareqqinnissamik ilaanneeriarluni kinguneqarsinnaasarpog. Piginnittup pisariaqanngitsumik aningaasartuuteqartinnissaa pinngitsoorniarlugu erngerluni oqimaaqatigiissaareqqinnissamut illua' tungiliuttumik pingaarutilimmik imm. 3-mi ilanngussisoqarpoq.

Taaguummot aningaasaliiffissat akuleriiaat-nut atuutissapput aningaasaliiffissanut killiliussat sukkulluunniit atuuttut. Maleruagassat atuuttut malillugit (aningaasaliiffissat nalorninarto-

qarsinnaanerannik nalunaaqutsiisarnissaq pillugu danskit nalunaarutaat 553, 1. juni 2016-i-meersoq) aningaasaliiffissanut akuleriiaanut ilaapput aningaasaliiffissat aningaasat aningaasaliissutigineqartut amerlassusii sinnerlugit annaasaqaataaratarsinnaasut, imaluunniit aningaasaliiffissat erseqqissumik paasiuminaatsut. Aningaasaliiffissat akuleriiaat nalunaarummut ilanngussaq 1-imi "aappaluttumik" nalunaaqutsigaapput, ilaatigullu tassaapput Aktieswaps-it aamma aktiat nalinginut uuttuutitut swaps-it, aningaasaliissuteqartarfinni allani piginneqataassutit, inuussutissarsiornermi obligationit niuerfinni aaqqissuussaasuni nioqqutigineqanngitsut, siunissami erniaajumaartussat pillugit isumaqatigiissutit, aaqqissuussaasumik uninngasuutit akuleriiaanik iluanaaruteqarfiusartut aamma/imaluunniit piffissaq sioqqullugu atorunnaarsinneqassagaluarunik erseqqissumik paasiuminaatsunik aningaasartuuteqarfiusussat, pantebrevit.

Aningaasaliiffissat akuleriiaajunngitsut tassaapput aningaasaliiffissat, aningaasat aningaasaliissutigineqartut tamakkerlugit annaaneqaratarsinnaanerisa ilimanaateqarnerata mikisuararsuuffii, aningaasaliiffissallu sorphiaaneri paasiuminartut aamma aningaasaliiffissat, aningaasat aningaasaliissutigineqartut tamakkerlutik ilaannaasaluunniit annaaneqaratarsinnaaffii. Aningaasaliiffissalli sorphiaaneri paasiuminaatsuunngillat. Aningaasaliiffissat, aningaasaliiffissat nalorninarqarsinnaanerannik nalunaaqutsiisarnissaq pillugu nalunaarummut ilanngussaq 1-imi "Qorsumik" imaluunniit "Sungaartumik" nalunaaqutsigaapput, ilaatigullu tassaallutik realkreditobligationit danskit taarsigassarsisitsisarfiinit pilersinneqarsimasut, skatkammerbevisit, skibskreditobligationit aamma kasseobligationit umiarsuarmik pisinermi taarsigassarsisitsisarfiimmit pilersinneqarsimasut, aktiat aaqqissuussaasumik niuerfimmi niuerfimmiluunniit allami nioqqutigineqartartut, aamma aningaasaliisarnermik peqatigiiffinni, aningaaseriveqarnermik ingerlatsineq pillugu inatsimmi §§-it 157 a aamma 157 b naapertorlugit aningaasaliinermut killiliussat malillugit aningaasaliisartuni piginneqataassutit.

Imm. 3-mut.

Soraarnerussutisiaqarnissamut uninngasuutitut kontumut ukiuni kingullerni pingasuni akiliuteqartoqarsimappat, piginnittorlu ukiuni oqimaaqatigiissaareqqittussaaffiusumi ullormi 31. december 63-inik ukioqalereersimangippat oqimaaqatigiissaareqqinnissaq pisinnaavoq ileqqaakkat sinneruttut siunissamilu akiliutigineqarumaartussat aktianik aningaasaliiffissaniluunniit akuleriiaanik pisinermut atunnginnerisigut. Piginnittoq taama pisoqartillugu aktiaatiminik il.il. tunisinissamik pinngitsaalineqanngilaq.

Piginnittut 63-inik ukioqalereersimasut imaluunniit soraarnerussutisiaqarnissamut uninngasuutitut kontunik ukiuni kingullerni pingasuni akiliuteqarfiusimangitsunik piginnittut, aningaasaliiffissanut killiliussat imm. 1-imiittut qaangerneqarsimappata ingerlaavartumik oqimaaqatigiissaareqqittussaassapput.

§ 47 d-mut

Aningaasat soraarnerussutisiaqarnissaq siunertaralugu ileqqaakkaniittut pigisanik il.il. sunik pisissutigineqarsinnaanerata aalajangersakkami malittarisassiuunneqarpoq. Maleruagassanik taakkuninnga malinninnginnerup kingunerissavaa, aningaasat maleruagassat naapertornagit pisissutigineqartut piffissaq sioqqullugu tiguneqartut isigineqarnissaat, tak. siunnersuummi § 47 i, akileraarutillu § 46, imm. 1-imi taaneqartup akilerneqarnissaa.

Imm. 1-imut.

Aningaasat soraarnerussutisiaqarnissaq siunertaralugu ileqqaakkaniittut pigisamik aalaakkaasumik pisinermut atorneqarsinnaanngillat. Tamanna pigisap aalaakkaasup sumut atorneqarne- ra, imaluunniit pigisap aalaakkaasup nalikillilerneqarsinnaasuunera nalikillilerneqarsinnaa- suunnginneraluunniit apeqqutaatinnaagit atuuppoq.

Aningaasattaq aktianik anpartinilluunniit, selskabimi atuisinnaanermik piginnaatitaaffinnik, akikillisaatinik assigisaannilluunniit tunniussinissamik siunertaqartunut siunertamilluunniit ilaattut taamatut siunertaqartunik pisinermut atorneqarsinnaassanngillat. Atuisinnaatitaaneq soorlu tassaavoq selskabi akunnittarfimmik ingerlataqarpat, taavalu aktiaatilik akunnittarfiup atortuinik ataavartumik piffissamiluunniit sivikinnerusumi akiliuteqarani atuisinnaalluni. Aki- killisaaneq tassaavoq aktiaatillip akunnittarfimmik atuinermini, inuup selskabimi aktiaateqan- ngitsup taamaaqataanik atuinermini akiliutissaanit appasinnerusumik akiliinissaa.

Aningaasat aktianik il.il., aaqqissuussaasumik niuerfinni imaluunniit niuerfittut aaqqissuus- saasuni niuerutissatut ilanngunneqarsimanngitsunik pisinermut atorneqarsinnaanngillat.

Aaqqissuussaasumik niuerfik tassaavoq niuerfittut aaqqissuussaq aningaasanik niuerfimmit ingerlanneqartoq aamma/imaluunniit isumagineqartoq, aaqqissuussallu iluani aammalu taassu- ma maleruqqusai avaqqunneqarsinnaanngitsut malillugit, inuit pingajuusut assigiinngitsut akunnerminni aningaasanik nalilinnik pisinissamik tunisinissamillu soqutigisaannik ingerlatsi- sut, imaluunniit aningaasanik nalilinnik niuerfiup taassuma maleruqqusai aamma/imaluunniit aaqqissuussinera malillugit niuerutigineqartussanut ilanngunneqarsimasunik, aammalu akueri- neqarsimasunik aamma peqqussutit kiisalu MiFID-p peqqussutaani immikkoortoq III-mi aala- jangersakkat malillugit atuuttunik niuernissamik isumaqatigiittoqarnissaanik isumaginnittut. Tassa imaappoq ilaatigut aktianik nalunaarsugaanngitsunik pisisoqarsinnaanngilaq.

Aamma aningaasat soraarnerussutisiaqarnissaq siunertaralugu ileqqaakkaniittut suliffeqarfini, piginnittup suliffeqarfiup, matumani ilanngullugit soorlu interessentskabit, kommanditsel- skabini piginneqataassutit imaluunniit selskabit piginneqatigiiffiusut akiitsuisa akilerneqarnis- saannut nammineerluni akisussaaffiginniffiini piginneqataassutininik pisinermut atorneqarsin- naanngillat.

Imm. 2-mut.

Pappiaqqat aningaasanik nalillit, pappiaqqanik aningaasanik nalilinnik atuutilersitsisartumit ataatsimit atuutilersinneqartut piffissami pisiarineqarfimmini nalingat aktianik anpartinillu pisinikkut soraarnerussutisiaqarnissaq siunertaralugu ileqqaagaasut tamarmiusut 20 procenti-annit anginerusinnaangilaq. Kisianni pappiaqqanut aningaasanik nalilinnut, pappiaqqanik aningaasanik nalilinnik atuutilersitsisartumit ataatsimit atuutilersinneqartunut 50.000 kr.-it tamatigut inissinneqarsinnaapput. Aningaasat kisitsisit akinut iluarsissutit Naatsorsueqqis-saartarfimmit naatsorsorneqarsimasut tunngavigalugit iluarsineqassapput.

Aningaasat soraarnerussutisiaqarnissaq siunertaralugu ileqqaakkaniittut piginnittutut ingerlat-seqatigiiffimmi aningasaatit ilaannik pisinermut atorineqarnerat soraarnerussutisiaqarnissamut aaqqissuussinerup piffissaq sioqqullugu atorunnaarsinneqarneratut isigineqanngilaq.

Imm. 3.

Selskabimi aningaasaliiffigineqartussami piginnittoq nammineq ilaqquttaniluunniit peqatigalu-git aningaasaatit 25 pct.-iini amerlanerusunilluunniit piginnittuussanngilaq. Pigineqataassu-tit naatsorsorneqarneranni ilanngunneqassapput aktiat il.il., piginnittup soraarnerussutisiaqar-nissamik aaqqissuussinerup saniatigut pigisai kiisalu aktiat il.il., pineqartup aapparisaata, angajoqqaavisa, aatakkuisa aanakkuisalu, qitornaasa, erngutaasa taakkulu aapparisaasa pigi-saat. Qitornassat qitornavissartaarisimasallu ilaqtavittut isigineqassapput.

§ 47 e-mut.

Imm. 1-imut.

Soraarnerussutisiaqarnissaq siunertaralugu ileqqaakkanik piginnittup aktiat, obligationit, ani-ngaasaliiffissat akuleriiaat il.il., aningaasat soraarnerussutisiaqarnissaq siunertaralugu ileq-qaakkaneersut atorlugit pisiarineqarsimasut nammineq pissamisut tigugunigit, piginnittup pi-gisap tiguneqartup nalinga soraarnerussutisiaqarnissamut uninngasuutinut kontumut akilissa-vaa, pigisallu nalinga aningaaserivimmuut nalunaarutigissallugu. Nalingisa eqqortumik naat-sorsorneqarsimanerat Akileraaruseriffiup nakkutigisinnaavaa, ilaatigut tak. akileraaruseriner-mik ingerlatsineq pillugu Inatsisartut inatsisaanni § 57 aamma § 65.

Pigisap tiguneqartup nalinga appasippallaartumik nalunaarutigineqarpat, naliviusup pigisallu tiguneqartup nalingata assigiinnigissutaat piffissaq sioqqullugu atorunnaarsitsinertut isigine-qassaaq, aningaasallu § 46, imm. 1-imi aalajangersagaq naapertorlugu akileraaruserneqassal-lutik. Assiganik § 46, imm. 1, malillugu akileraarusiisoqassaaq, piginnittup soraarnerussutisiaqarnissaq siunertaralugu ileqqaakkanut, pigisap tiguneqartup nalingata ilaannaa akilersimappagu imaluunniit akilinngivissorsimappagu.

Imm. 2-mut.

Aalajangersagaq periarfissiivoq soraarnerussutisiaqarnissamut aningaaserivimmi Kalaalit Nunaanni angerlarsimaffeqartumi imaluunniit aalajangersimasumik ingerlatsiveqartumi ileqqaakkat aningaaserivimmi allami Kalaallit Nunaanni angerlarsimaffeqartumi imaluunniit aalajangersimasumik ingerlatsiveqartumi ileqqaakkanut assingusunut nuunneqarsinnaanissannik, akileraarutitigut akitsuutitigullu sunniteqanngitsumik. Aammattaaq aningaaseriviit § 47 a-mi taaneqartut aamma soraarnerussutisiaqarnissamut aningaasaateqarfiit aammalu inuunermut soraarnerussutisiaqarnissamullu sillimmasiisarfiit Kalaallit Nunaanni angerlarsimaffeqartut akornanni nuussisoqarsinnaavoq.

Tamanna ima paasineqassaaq aningaasat aaqqissuussinnermit nuunneqartut akileraarutaannik akitsuutaannilluunniit akiliisoqassanngitsoq. Aammattaaq ima paasineqassaaq aningaasat aningaaserivimmut allamut nuunneqartut ilanngaatigineqarsinnaanngitsut.

§ 47 f-imut.

Imm. 1-imut.

Tunniussisarnerit siusinnerpaamik aallartissapput ulloq piginnittup 60-inik ukioqalerfia aallarnerfigalugu, ukiukinnerunissaq akileraaruseriffimmit akuerineqarsimangippat. Tunniussisarnerit kingusinnerpaamik aallartissapput ullormi piginnittup soraarninngornissamut ukiut Utoqqalinersiaqarneq pillugu Inatsisartut inatsisaat aalajangersagaasut anguppagit. Soraarnerussutisiaqarnissamut uninngasuutinut kontumit tunniussisarnissat kinguartinnerisigut utoqqalinersiutinik amerlanerusunik pissarsinissap iluanaarniutigineqartariaqannginnera tamatumani eqqarsaatigineqarpoq.

Aamma 60-inik ukioqalereeraluarluni soraarnerussutisiaqarnissaq siunertaralugu ileqqaakkanut akiliisoqartarsinnaavoq. Kisianni inuuneq naallugu tunniunneqartartussanik imaluunniit naafferartumik tunniunneqartartussanik tunniussisarneq aallartereerpat kontumut akileeqqittoqarsinnaanngilaq.

Imm. 2-mut.

Piginnittup soraarnerussutisiassaasa tamarmiisut minnerpaamik 50 procentiisa inuuneq naallugu, toqussaq tikillugu ingerlaavartumik tunniunneqartartussaannissaat piumasaqaataavoq. Tamanna isumaqarpoq inuuneq naallugu tunniunneqartartussat piginnittup minnerpaaffissatut piumasaqaammik eqquutsitsinissaanik qulakkeerisussat, tunniussineq siulleq pitinnagu pilerinneqartussaassasut. Inuuneq naallugu soraarnerussutisiassat aningaasanit soraarnerussutisiaqarnissaq siunertaralugu uninngasuutineersunit aningaasalersorneqassapput.

Piginnittoq soraarnerussutisiaqarnissaq siunertaralugu ileqqaakkanik aamma soraarnerussutisiaqarnissamut inuunermullu sillimmasiinermik aaqqissuussinernik arlaqartunik peqarpat taakku tamarmik, soraarnerussutisiaqarnissaq siunertaralugu ileqqaakkat ilaat qanoq amerlati-

gisut inuuneq naallugu tunniunneqartartussaassanersut, ilaallu qanoq amerlatigisut naafferartumik ikinnerpaamik ukiuni qulini tunniunneqartarsinnaanersut naatsorsuinermi ilanngunneqassapput, taamaattorli tak. ataani imm. 3-mut tunngasoq.

Inuuneq naallugu tunniunneqartartussanik pilersitsineq inissiiffissanut killiliussat § 47 c, imm. 1-imiittut qaangerneqarnerannik kinguneqarsinnaavoq. Taamaattoqarpat kontup imarisaasa sinneri oqimaaqatigiissaaqqinneqassapput.

Piginnittup soraarnerussutisiaqarnissamut ileqqaagaasa tamarmiusut annerpaamik 50 procentii ukiuni ikinnerpaamik qulini naafferartumik amerlaqatigiiaatut tunniunneqartarsinnaapput (naafferartumik soraarnerussutisia). Assersuutigigutsigu piginnittoq soraarnerussutisiaqarnissamut aaqqissuussinermik § 39-mi § 39 a-miluunniit taaneqartumik 1 mio. kr.-inik nalilimmik aamma soraarnerussutisiaqarnissaq siunertaralugu ileqqaakkanik § 47 b-mi taaneqartumik 300.000 kr.-inik nalilinnik peqarpat, taava soraarnerussutisiaqarnissaq siunertaralugu ileqqaakkat tamarmik naafferartumik, ukiuni ikinnerpaamik qulini tunniunneqartarsinnaassapput.

Aalajangersakkakut qulakkearniarneqarpoq piginnittup naafferartumik tunniunneqartartuujunnartut tunniunneqartarunnaareeraluarpataluunniit soraarnerussutisianit tunniunneqartartunit pisarnissaa.

Naafferartumik tunniunneqartartussat tunniunneqartalereersut unitsikkallarneqarnissaat piginnittup aporfissaqanngitsumik aalajangersinnaavaa.

Aningaasat sivikinnerpaamik ukiuni qulini naafferartumik tunniunneqartartussatut immikkoortinneqarsimasut nalingat allanngorarsimappat piffissap tunniussiffiusartussap sivissusua sunnerneqarsinnaavoq, matumani aamma piffissap tunniussiffiusartussap ukiunit qulinit sivikinnerulerneranik kinguneqartumik.

Imm. 3-mut

Nalingisa imm. 2-mi pineqartut naatsorsornissaanni ulloq tunngavigineqartussaq kingusinnerpaaq suussanersoq aalajangersakkami aalajangersarneqarpoq.

Imm. 2 naapertorlugu naatsorsuinermi taamaallaat ilanngunneqassapput soraarnerussutisiaqarnissaq siunertaralugu ileqqaakkat aamma soraarnerussutisiaqarnissamut inuunermullu sillimmasiinermit aaqqissuussinerit tunniussiviusalereersut imaluunniit ukiut pingasut qaangiutinninneranni tunniussiffiusalersinnaasut.

Imm. 4-mut

Imm. 2 aamma 3 naapertorlugit naatsorsuinerup takutippagu piginnittup soraarnerussutisiaqarnissaq siunertaralugu ileqqaagaasa nalingat tamarmiusoq 700.000 kr.-init minnerusoq, piginnittup 100.000 kr.-it tikillugit ataasiartumik tigusunnaavai, aningaasallu sinneriunnagaat

qaammammut 4.500 kr.-ikkaarlugit tunniunneqartassapput. Siunnersuutip siunertaraa soraarnerussutisiaqarnissaq siunertaralugu ileqqaakkanut atatillugu allaffissornikkut suliassanik millisaanissaq.

Imm. 5-imut

Soraarnerussutisiaqarnissaq siunertaralugu ileqqaakkanut kontumi aningaasaatit nalingat 25.000 kr.-init minneruppat aningaasat, imm. 2 aamma 4 apeqqutaatinnagit piginnittumut ataasiartumik tunniunneqarsinnaassapput. Siunnersuutip siunertaraa soraarnerussutisiaqarnissaq siunertaralugu ileqqaakkanut atatillugu allaffissornikkut suliassanik millisaanissaq.

§ 47 g-mut.

Imm. 1-imut.

Aningaaseriviit akileraaruseriffimmut ukiumoortumik nalunaaruteqartussaataitanerat aalajangersakkami aalajangersarneqarpoq. Nalunaarutip imarissavai soraarnerussutisiaqarnissamut ileqqaakkat aningaasartaat akilerneqarsimasut tunniunneqarsimasullu tamarmiusut pillugit paasissutissat.

Aalajangersakkakut anguniarneqarpoq akileraaruseriffiup soraarnerussutisiaqarnissaq siunertaralugu ileqqaakkanik akileraarusiisarnermik nakkutilliinissaminut tunngavissaqarnissaa.

Soraarnerussutisiaqarnissaq siunertaralugu ileqqaakkat pillugit paasissutissanik nalunaarsuisarnissaq pillugu malittarisassanik allanik Naalackersuisut aalajangersaasinnaapput, matuma ataani fondskodenik nalunaarsuineq, pigisanik nalilinnik tigusinermi il.il. Nalunaarsuisussaataitanermik aalajangiiniarnermi innuttaasunut aningaaserivinnullu aningaasartuutissat eqqarsaatigilluarneqarniassapput, misissuinermut atatillugu naleqqunnersut.

Imm. 2-mut.

Aalajangersakkap kinguneraa aningaaseriviit, sillimmasiisarfiit il.il. soraarnerussutisiaqarnissaq siunertaralugu ileqqaakkanit, sillimmasiinermit il.il. tunniussinerminni unerartitsisussaatiitaasutut isigineqarnerat, taamaattumillu aamma tunniussinernut atatillugu ilaatigut akileraarutininik A-nik unerartitsissasut.

§ 47 h-mut.

Aalajangersakkami aalajangersarneqarpoq piginnittup, imaluunniit piginnittup toquneratigut tunniunneqartussanik pisinnaatitaasup aningaasarsianit akileraartussaataitanera, tak. § 47 b, imm. 2.

§ 47 i-mut.

Aalajangersakkat makku soraarnerussutisiaqarnissaq siunertaralugu ileqqaakkanut tunngatil-lugu taamatulli atuupput:

§ 39, imm. 2, § 40 a, imm. 1, § 41, imm. 1 aamma 3, § 46, imm. 1-3, aamma § 47.

§ 39, imm. 2 sillimmasiinernik piginnittuunermut tunngasuuvoq. § 40 a, imm. 1 sillimmasii-nermut akiliutip ilaata qanoq angitigisup qularnaveeqqusiinermik akiliinermut atorneqarsin-naaneranut tunngasuuvoq. § 46, imm. 1-imiit 3-mut piffissaq sioqqullugu atorunnaarsitsinerup kingunerisaanut tunngasuupput, § 47-lu piffissaq sioqqullugu atorunnaarsitsinermut atatillugu unerartisisussaatitaanermut akiliisussaatitaanermullu tunngasuulluni.

Nr. 4-mut.

Kinguaariinnut tullernut nikisitsinermut atatillugu aningaasanut akileraarusigassanut kinguar-tinneqartunut killiliussap 100.000 koruuniniit 350.000 koruuninut qaffanneqarnissaa siunner-suutaavoq.

Aalajangersakkap kinguneraa aningaasat kingusinnerusukkut akileraarusigassatut kinguartin-neqarsinnaasut ukiumut aningaasarsiorfimmut ataatsimut 350.000 koruuninit amerlanerusin-naangitsut. Tassa imaappoq sulisup akissarsiami ilaasa aktianik anpartinilluunniit pisissutigi-sami 350.000 koruunit akileraaruserneqarnissaat kinguartinnaavaa, taakkulu saniatigut 350.000 koruunit allat, sulisup aktiat anpartilluunniit akikinnerutillugit pisiarinerisigut pissar-siai, tassa katillugit 700.000 koruunit.

Apeqqutaangilaq aktiat anpartilluunniit ukiup aningaasarsiorfiup ingerlanerani ataasiaannar-luni arlaleriarluniluunniit pisinikkut pissarsiarineqarnersut.

Akileraarusiinissaq kinguartinneqartoq ukiumi aningaasarsiorfimmi, pineqartup aktianik an-partinilluunniit pissarsiarisimasaminik taakkuluunniit ilaannik tunisaqarfiani, imaluunniit uki-umi aningaasarsiorfimmi Kalaallit Nunaannut tamakkiisumik akileraartussaataanerup ato-runnaarfiani pissaaq.

Nr. 5-imut.

§ 57, imm. 3-mi oqaaseqatigiit aappaannik nutaanik ilanngussinissaq siunnersuutaavoq. Aala-jangersakkakkut anguniarneqarpoq § 57, imm. 1-imi akuersissutip aningaasartaasa amerlaner-paaffissalerneqarnissaat. Tassa imaappoq akuersissutit ukiut qulit sinnerlugit atuussinnaangi-laq. Aamma aktiat anpartillu pisiarineqarsimasut nalingat kiisalu piginneqataassutit akikin-ne-rutillugit pisiarineqarsimasut nalingat, ukiut taakku katillugit 3,5 mio. kr.-init amerlanerusin-naanngillat.

§ 2-mut

Inatsisip 1. januar 2017-imi atortuulernissaa siunnersuutaavoq.

Imm. 2-mut

Ikaarsaariarnermi aaqqissuussinermut atatillugu siunnersuutaavoq § 47 c, imm. 2-p 3-llu, oqimaaqatigiissaareqqinnermut tunngasut aatsaat 1. januar 2020-mi atuutilernissaat.

Imm. 3-mut

Siunnersuutaavoq soraarnerussutisiaqarnissamat inuunermulluunniit sillimmasiineramik aaqqissuussinernut, inuuneq naallugu ingerlaavartumik tunniussiviusartussanut akiliutit, maannakkorpiaq aningaasarsiat Inissiani attartortittakkani ineqarnermut tapiissutit pillugit Inatsisartut inatsisaat, Utoqqalinersiaqarneq pillugu Inatsisartut inatsisaat aamma Siusinaartumik pensionisiat pillugit Inatsisartut inatsisaat naapertorlugit naatsorsorneranni ilanngunneqassanngitsut, pensionisiaqarsinnaatitaasup imaluunniit sillimmasiisup aaqqissuussinermut akiliutit, aningaasarsiat akileraaruteqaataasussat naatsorsorneranni ilanngaatisinnaanngippagit imaluunniit sulisitsisup akileeqataassutai ilannguttussaappagit, tak. § 39 a, imm. 1 aamma 2.

§ 39 a, imm. 1-imut 2-mullu innersuussinerup kinguneraa soraarnerussutisiaqarnissamat aamma inuunermut sillimmasiineramik aaqqissuussinerit § 39 a, imm. 1-imi 2-milu piumasaqaatinik naammassinnittut kisimik aalajangersakkami pineqartunut ilaanissaat. Tassa imaappoq aaqqissuussinerit piumasaqaatinik naammassinninngitsut maannakkorpiaq aningaasarsiat naatsorsorneranni ilanngunneqartussaassat.